

MANATU AOAO: “IA MANATUA PEA LE ATUA I SO O SE MEA”

MANATU TA’IALA: IANUARI MA FEPUARI: O LE SILISILIESE O LE ATUA

O le amataga o feau o lenei Tausaga, e moomia ai le toe manatua o le Silisiliese ma le Mamalu o le Atua na afua ai le ola ma le malosi fa’afouina. O le tutupu ai o vavega ma faamanuiaga i le soifua ma le ola, e talitonu le mafaufau, ua na o le silisiliese lava o lo tatou Atua e mafaia ai.

ASO SA: 25 IANUARI 2026

MATAUPU: O LE MANA O LE ATUA I LE FOAFOAGA

SINI: Ia malamalama le vasega, o le foafoaina o le lalolagi i le amataga, ua na o le mana lava o le Atua na faia ai.

TUSI FAITAU: Kenese 1:1–5

FESOASOANI MO FAIAOGA:

O ai e masani ona va’ava’ai i le lagi i le pō? O a ni foliga va’aia, ae o a foi ni mea o ai? E masani lava ona va’aia fetu faapea le masina. A oo i le ao, e masani ona va’aia le mata o le la, o ao o loo fegāsoloa’i ai. E ese le matagofie ma le ofoofogia, ona o lona fausiaina, ma lona fa’atumauiina i aso uma ma taimi uma. Ae o ai la na faia ia mea matagofie ma le ofoofogia?

O le fa’amoemoe lea o le tatou mataupu i lenei aso Sa, o le a tatou aoaoina ai le amataga o mea uma, ma le mana tele na fa’aalia e le Atua i le foafoaga.

O le fuaiupu muamua lava o le Tusi Paia o loo fa’aalia ai le amataga o mea uma. E le’i i ai se lalolagi, e le’i i ai se lagi, e le’i i ai se tagata. Peita’i ua na o le fetalai mai o le Atua ona tutupu ai lea o mea uma. O le Atua e sili ona malosi; e mafai ona Ia faia mea uma e ala i Lana lava Upu, ma e leai se isi e mafai ona faia ni mea faapea.

O le foafoaga o le lalolagi e faamanatu mai ai mo i tatou, e mafai e le Atua ona faia ni mea mata’ina e sili atu nai lo o tatou mafaufau. E mafai foi ona Ia faia ni suiga i o tatou olaga, e pei lava ona Ia faia se suiga tele i le pogisa, ma faatupu ai le malamalama.

O le mana lea o le Atua e le na o le foafoaga i le amataga, ae o loo galue pea i o tatou olaga i aso uma. A tatou lagona le fefefe, lē mautonu, po o le faavaivai, e mafai ona tatou faatuatua o loo i ai le Atua e aumaia le malamalama i o tatou olaga pogisa. E tataua ona tatou faatuatua ma talitonu i Lona malosi i taimi uma.

GALUEGA FA’ATINO: TUSIGA ATA

Tuu i tamaiti ina ia tusia se ata o se vaaiga o le lalolagi i le aso muamua o le foafoaga: se lagi pogisa, ma le malamalama.

TALIGA FESILI:

1. I le amataga, o ai na faia le lagi ma le lalolagi?

Tali: O le Atua.

2. Sa iai se malamalama i le amataga?

Tali: Leai, sa pogisa.

3. O le ā le upu a le Atua na faia ai le malamalama?

Tali: "Ia i ai le malamalama."

4. O le ā le igoa na faaigoaina e le Atua i le malamalama?

Tali: Aso.

5. O le ā le igoa mo le pogisa?

Tali: Pō.

6. O le ā le aso o le foafoaga lea na faia ai le malamalama?

Tali: O le aso muamua.

7. O le ā e mafai ona tatou faatuatua ai pe a tatou feagai ma faigatā

I o tatou olaga?

Tali: O le mana o le Atua e mafai ona fesoasoani ma suia mea uma.

PESE: O lo'u Atua silisiliese (My God is so Great...)

My God is so great, so strong and so mighty, there's nothing my God cannot do.

My God is so great, so strong and so mighty, there's nothing my God cannot do.

The mountains are his, the rivers are his, the stars are His handiwork, too.

My God is so great, so strong and so mighty, there's nothing my God cannot do, for you!

A'OA'OGA:

1. Ua na o le Atua ma lona mana e mafaia ai mea uma.

2. E leai lava se isi e sili atu na lo le Atua, o Lē na faia mea uma.

3. E fa'alogo mea uma o le foafoaga i le Atua.

.....

ASO SA: 1 FEPUARI 2026

MATAUPU: O LE PA'Ū O LE TAGATA

SINI:

Ia malamalama le vasega, o le lē usita'i o le tagata, na mafua ai ona pa'ū (fall) ma fa'apologaina.

TUSI FAITAU: Kenese 3:1–6

FESOASOANI MO FAIAOGA:

I le amataga, na faia ai e le Atua se togalaau matagofie e igoa o Etena. Sa nonofo ai Atamu ma Eva i lea nofoaga matagofie. Sa maua uma e i laua mea uma na manaomia mo le ola fiafia. Na tuuina atu e le Atua se poloaiga tāua, e mafai ona la aai i fua uma o laau i le togalaau, vaganā ai le tasi laau, o le laau e iloa ai le lelei ma le leaga. Na lapataia i laua, pe a la aai i le fua o lena laau, o le a la oti ai.

Ae na sau le gata, o se manu e atamai tele. Na faatosina e le gata Eva, ma fai atu i ai e le moni le upu a le Atua, e le oti ai pe a latou aai ai. Nai fai atu le gata, afai e latou te aai i le fua o le laau, o le a latou pei o le Atua, ma iloa ai le lelei ma le leaga. Na tilotilo Eva i le fua, ma sa foliga manaia, ma manaia mo le ai, ma manatu o le a aogā mo le atamai. Ona ia ai ai lea, ma avatu foi i Atamu, ma ai ai foi o ia.

O le solitulafono lea na pa'u ai le tagata i le agasala. O le lē usiusitai lea i le Atua na amata ai ona ulu mai le agasala i le lalolagi. Ona amata ai lea ona mafatia le tagata, feagai ai ma faigatā, o tiga, fa'atasi ai ma le oti.

O lenei tala o le pa'ū o le tagata o loo a'oa'oina ai i tatou i ni manatu tāua. Muamua, e pepelo le fili (Satani). E masani ona faaaoga e Satani ni upu faasese e faatosina ai tatou e solia poloaiga a le Atua. Lona lua, o le lē usiusitai i le Atua e leaga lona i'uga. E ui sa i ai ia Atamu ma Eva le tele o mea lelei, ae na lē fiafia le gata i le upu a le Atua, ma faapena foi i laua. Ma le lona tolu, e tāua tele le faalagolago i le upu moni a le Atua. Ai lava ana tumau Atamu ma Eva i le usiusitai, semanu e lē o'o mai le agasala ma le faanoanoa i le lalolagi.

E tele faatosina i lo tatou olaga i aso uma. E tele mea e foliga manaia i mata, ae o le faaiuga o ia mea o le mafatia. E mafai ona tatou taumafai

e tetee i faatosina, i le faitau i le Tusi Paia, i le tatalo, ma le fiafia e fesoota'i ma le Atua. A tatou mafaufau i le mea na tupu ia Atamu ma Eva, e ao ona tatou iloa, e lelei le usiusitai i le Atua, aua o Ia lava e silafia mea uma mo lo tatou lelei.

O le mataupu o le "Pau o le Tagata" o se lapataiga tāua mo i tatou uma. E tatau ona tatou nofouta i pepelo a le fili, ma ia tatou taumafai i taimi uma, e ola usiusitai i le Atua. E le faigofie, ae o le fesoasoani a le Agaga Paia e mafai ona tatou manumalo ai i faatosina ma tumau i le ala sa'o.

GALUEGA FA'ATINO: TUSIGA ATA

Ia tusia se ata o le togalaau o Etena. I totonu o le ata, ia manino mai ai le fa'aosoosoina e le gata o Eva, ma le aina e Eva ma Atamu o le fua o le laau na faasaina.

PESE: E lelei le Atua (God is so Good)

A'OA'OGA:

1. E leaga le ola lē usiusita'i, e fa'asalaina ma fa'apologaina.
2. Aua le faiaina gofie ia fa'aosoosoga a le fili.
3. Fa'alogi i le Atua e manuia ai le ola.

.....

ASO SA: 8 FEPUARI 2026

MATAUPU: O NOA MA LE LOLO

SINI: Ia malamalama le vasega, o le usita'i ma le fa'amaoni o le fa'alogi i le Atua, e fa'asaoina ai le ola.

TUSI FAITAU: Kenese 6:9–22

FESOASOANI MO FAIAOGA:

O Noa o se tagata amiotonu ma sa savavali ma le Atua, e ui ina leaga tagata uma i lona taimi.

Ua silasila le Atua i le leaga ma le amioletonu o tagata i le lalolagi, ma ua Ia finagalo e fa'aumatia tagata uma i se lolo tele. Peita'i, na alofa le Atua ia Noa ona o lona amio sa'o, ma poloa'i atu ai ia te ia e fau se vaa tele e puipui ai o ia, o lona aiga, ma ituaiga uma o manu.

Na faia e Noa mea uma na poloa'i mai e le Atua ia te ia, e aunoa ma le faitioina po o le faatali. Sa faia e Noa le vaa i le umi ma le lautele ma le maua luga e pei ona faatonuina, ma sa sauniuni foi e ao mai manu e ta'i lua i ituaiga taitasi i totonu o le vaa.

O le tāua o lenei tala ia Noa e faailoa mai ai le tāua tele o le usiusitai i le Atua, e tusa lava pe e le mafai ona tatou malamalama i mea uma o ana fuafuaga. Sa le faigofie le galuega a Noa, ona e tatau ona ia fau se vaa tele i le elele matutu, e aunoa ma se vai e lata ane. E mautinoa sa tauemu tagata ia te ia, ae sa tumau pea o ia i le faia o le mea sa'o.

O le lolo o se fa'aailoga o le fa'amasinoga a le Atua i le amioletonu o tagata, ae o le vaa o Noa o se faailoga o le alofa mutimutivale ma le lavea'iina mo ē e usiusita'i.

O loo valaauina i tatou i aso nei e ave ma tagata pei o Noa, e faamaoni, usiusitai, ma faatuatua i le Atua i taimi uma.

A tatou feagai ma tulaga faigatā, e pei o le faia o le filifiliga sa'o i totonu o se lalolagi leaga, ia tatou manatua Noa. E tatau ona tatou tumau i le faia o mea sa'o e tusa ma le finagalo o le Atua, e ui ina ese tagata i o tatou siosiomaga. E tauia i tatou e le Atua pe a tatou usitai ma talitonu i Lana upu.

GALUEGA FA'ATINO: TA'ALOGA

- Vaevae tamaiti i ni vaega laiti (4–6 tagata i le vaega). Tu'u i vaega ta'itasi ni pepa tetele, lipine, ma peni.

- Fai atu i vaega taitasi e tataua ona latou "fau" se vaa e mafai ona "taofia" uma i latou i luga o le pepa (e pei o le vaa o Noa).
- I totonu o le taimi faatulagaina (3–5 minute), latou te galulue faatasi e fausiaina lo latou "vaa" ma ata ai manu e lua o ituaiga taitasi i luga o le pepa.
- I le faai'uga, faitau le taimi o le aofai o tamaiti e mafai ona nonofo i totonu o le "vaa" (totonu o le pepa).

Fesili:

1. *O ai o la outou vaega na sili ona fesoasoani lelei?*
2. *Na outou faigaluega faatasi pei o Noa ma lona aiga?*

PESE: O ai na fau le vaa....

A'OA'OGA:

1. Ia tatou galulue faatasi mo se mea lelei.
2. Ia usiusitai i le Atua e manuia ai o tatou olaga.
3. E fesoasoani le Atua i a tatou galuega.

.....

ASO SA: 15 FEPUARI 2026

MATAUPU: O LE FOLAFOLAGA A LE IA APERAAMO

SINI: Ia malamalama le vasega i le tāua o le usita'i ma le faatuatua, e tusa lava pe le o manino le ala e savalia.

TUSI FAITAU: Kenese 12:1–9

FESOASOANI MO FAIAOGA:

Na valaau le Atua ia Aperaamo e tuua lona aiga ma lona nu'u, ma alu i se nu'u ua finagalo i ai le Atua. Na o faatasi ma le valaau lenei, se folafolaga tele mo Aperaamo, lea o le a faia ai o ia ma nu'u tele, o le a faamanuia le Atua ia te ia ma lona suafa. E avea o ia ma faamanuiaga i tagata uma, ma o ē e faamanuia ia te ia, e faamanuia ai fo'i i latou e le Atua, a o ē e faalumaina o ia, e faalumaina i latou e le Atua. O ia fo'i, o le a faamanuiaina ai nuu uma o le lalolagi.

E ui e le'i ta'u manino le nofoaga, ae na savali Aperaamo i le faatuatua, ma alu atu i le nu'u ua folafola mai e le Atua. E leai se faafanua na avatu ia Aperaamo, ae na alu i le talitonuga, e ta'ita'i le Atua i la'asaga uma. O le ata manino lea o le tagata e usita'i i le upu a le Atua.

E le faigofie ona tuua se olaga sa masani ai, ae na talia e Aperaamo le valaau, e aunoa ma se fesiligia o ni fa'amanuiaga tau i totogi, e pei ona masani ai le olaga.

O le tāua lea o le tala o lenei aso Sa. O le iloa lelei e Aperaamo o lē o loo valaauina o ia ma folafola mai mo ia, o le Atua lea. Auā foi o le a saunia uma e le Atua mea e moomia e le ola, mo le faatinoina o le valaauina. O le feau manaia lea mo tupulaga uma o loo talitonu ma le fa'amaoni i le Atua o loo tatou auauna i ai. A valaauina loa i tatou e le Atua mo soo se feau, ia tau lava o lo tatou faalogo ma usita'i, ma faatino loa

GALUEGA FA'ATINO. Savali ma le Fa'atuatua

Mea e manaomia: o se ie umi e ufiufi ai mata o tamaiti (blindfold)

Fa'amatalaga:

- Filifili se tamaitiiti e fai ma Aperaamo. Ufiufi ona mata. Fa'atonu o ia e savali, ae o le faia'oga e ta'ita'i atu i le leo.
- A mae'a, ona fesili lea:

“E faapefea ona e lagona i le savali e aunoa ma le vaaia?”

“E faapefea ona e faatuatua le leo o le faia’oga?”
“E tutusa lenei mea ma le tala i le faatuatua o Aperamo?”

O le fa’amoemoe o lea galuega fa’atino, ina ia iloa e tamaiti e le faigofie le savali i se mea e le o iloa, ae e mafai i le faatuatua, ma le talitonuina o lē o loo valaau mai.

PESE: Trust and Obey. (A tumau ia Iesu)
When we walk with the Lord in the light of his word,
What a glory he sheds on our way!
While we do his good will, he abides with us still,
And with all who will trust and obey.
Trust and obey, for there’s no other way
To be happy in Jesus, but to trust and obey.
Not a burden we bear, not a sorrow we share,
But our toil he doth richly repay;
Not a grief or a loss, not a frown or a cross,
But is blest if we trust and obey.

A’OA’OGA:

1. Ia fa’alogo ma usita’i i le Atua e pei o Aperamo
2. E manuia le tagata e faatuatua ma talitonu i le Atua
3. E leai se mea e faigata i le Atua
.....

ASO SA: 22 FEPUARI 2026

MATAUPU: O LE FA’ASA’OLOTOINA E LE ATUA O ISRAELU

SINI: Ia malamalama le vasega, ua na o le Atua lava e mafai ona fa’asa’olotoina le tagata ola pologa.

TUSI FAITAU: Esoto 14:1–6

FESOASOANI MO FAIAOGA:

O le fa’asa’olotoina, o le tatalaeseina o ni noanoaga, o ni loka, poo se falepuipui foi sa lokaina ai se tasi poo ni tagata. O le i ai o Isaraelu i totonu o Aikupito, sa ola i le pologa ma se olaga e leai se sa’oloto o i ai. Ma o le ala lea na tapena ai e le Atua le toeaina o Mose, mo le fa’asa’olotina o lona nuu o Isaraelu mai Aikupito.

Ina ua tuua e le fanauga a Isaraelu le nuu o Aikupito, na amata ai lo latou malaga i le toafa i le taita’iga a Mose. Peita’i, na ta’u atu e le Atua ia Mose ina ia fai i le nu’u e toe liliu ma to lauapi i tafatafa o le sami ulaula, e ui e le masani ai i lea itu, ma e foliga mai e leai se auala e mafai ai ona fa’aauuina le malaga.

Na manatu Farao ma ona tagata, ua leiloa le ala o le nu’u o Isaraelu, ma ua foliga ua punitia i latou i le vao. Ona fa’amaa’a ai lea o le loto o Farao, ma na ia filifili ai e tuliloa le fanauga a Isaraelu ma lana autau atoa i solofanua, o ta’avale taua, ma fitafita. Ae o le mea moni, e le o le sese o le nu’u poo ua lē iloa e Isaraelu se ala e malaga ese ai, ae o le fuafuaga lava na faia e le Atua.

O le mea lava na faia e le Atua ina ia fa’aalia ai lona mana ma lona mamalu. E ui ina lē malamalama i ai Isaraelu i lea taimi, ae sa i ai lava le fa’amoemoe o le Atua, ina ia faaali atu o Ia o le Atua malosi, e le mafai ona taofia lona finagalo, ma ia faasa’olotoina moni lava lona nu’u mai i le malosi o Aikupito. Ia lē gata o Farao ma Aikupito, ae ia fa’apena fo’i ia Isaraelu.

O le mea e moomia ia Farao ma tagata o Aikupito, ina ia o latou mautinoa, e silisiliese lava le Atua o Isaraelu, ma e lē mafaia e se isi lava mea o i le lagi poo le lalolagi ona fa’ato’ilaloina le malosi o le Atua. Ae mo tagata o le nuu o Isaraelu, e moomia le fa’alogo ma le usita’i, ina ua talitonu fa’amaoni i le Atua na fa’amaite ai le fa’asa’olotoina.

O le Atua e tu i ona tagata ua fa’apologaina ma sauāina. O Ia lava e saunia ma tapenaina le sa’olotoga mo ona tagata. Mo i tatou uma o le

fanau, ia tatou mautinoa ua na o le Atua ma lona mana silisiliese, e mafai ai ona fa'asa'olotoina soo tagata o loo ola pologa.

GALUEGA FA'ATINO: FA'AILOA I ATA

Tufa ni pepa A4 i tamaiti, latou te tusia ai le ata o le tala sa fa'amatalaina. Ia manino mai ai le ola pologa sa i ai, ma le sa'olotoga ua i ai. A mae'a, ona fa'asolo lea e fa'amatala le uiga o le ata.

PESE: Sa'oloto (*fati: Malosi, malosi e amo le to'i*)
Sa'oloto, sa'oloto, sa'oloto sa'oloto
Le Atua alofa ua ou sa'oloto
Fa'afetai lo'u Atua o lo'u Matai
Ua ou ola fiafia ai

A'OA'OGA:

1. E pule aoao le Atua i mea uma lava, e oo lava i le ola o le tagata.
2. Aua le ola fa'asagatau i le Atua.
3. Ia usita'i e saogalemu ai.

.....

MANATU TA'IALA MATI:

“LAGONAINA O PUAPUAGA O IESU”

O le vaitau lenei i le Kalena e masani ai lava ona tatou fa'amanatu ma lagonaina ai puapuaga sa feagai ma lo tatou Alii o Iesu. O le taua o lea vaitau, ina ia tatou manatua ai tigā sa feagai ma lo tatou Alii Fa'aola, mo le fa'aolaina o i tatou mai agasala uma.

ASO SA: 1 MATI 2026

MATAUPU: UA ULUFALE IESU I LE MALUMALU

SINI: Ia malamalama le vasega, o le afio ane o Iesu i le malumalu, ina se'i fa'amanino i tagata le tāua o lea fale mo le Atua.

TUSI FAITAU: Mataio 21:1-11

FESOASOANI MO FAIAOGA:

O le tala o lenei aso Sa, o le tala i le ulufale atu o Iesu i le malumalu. Ina ua taunuu le malaga i Ierusalem, ona na Ia aga'i loa lea i le nofoaga paia, o le malumalu o le Atua. O le malumalu o le nofoaga sa tataua ona fa'apa'ia mo le tapua'iga, mo le tatalo, ma le feiloa'i ai o tagata ma le Atua, e ala i sauniga ma tapua'iga. Peita'i, ua lē o lea se vaaiga na iloa i le malumalu, ina taunu'u atu le Alii o Iesu. Ua lē o foliga o se fale mo le tapua'iga, auā ua fai ma nofoaga ua fa'atino ai fefa'ataua'iga o oloa, ma fesua'iga o tupe. Ua fa'atau atu ai manu mo taulaga. O nisi ua fa'aogaina ai e mo a latou lava fa'amanuiaga.

Ina ua ulufale atu Iesu, na ia le toe onosa'i, a ua Ia tutuli i fafo tagata fa'atau oloa ma a latou oloa. Na ia fuli'ese laulau o e fesuia'i tupe, ma Ia faamanatu atu, “O lo'u fale e ta'ua o le fale tatalo, a ua outou faia ma ana o e faomea!”

O le ita o Iesu e le o se ita fa'aletagata, ae o le ita paia, ona ua vaai i le nofoaga paia ua liliu e tagata e fai ma nofoaga o pisinisi. Peita'i, na tumau pea le agalelei o Iesu i e na manaomia le fesoasoani. Na ia fa'amalolo tagata tauaso ma pipili i totonu o le malumalu.

O le malumalu o se nofoaga mo le Atua. E tataua ona tatou fa'aaloalo i ai, ona o le Fale o le Atua, ua fa'apitoa mo le Atua, e ala i sauniga ma tapua'iga i le Atua. E tataua ia i tatou ona fa'amamalu ma fa'aaloalo e tapua'i ai, e tatalo ai, ae le o se nofoaga e faia ai ni mea e lē mamā fa'apei ona faia e nisi o tagata Iutaia.

To'atele i tatou e masani ona ta'aalo ma pisapisaō i totonu o le malumalu poo le falesa, aemaise lava i taimi o sauniga ma tapua'iga. Ua a'oa'o mai lenei mataupu ina ia tatou fa'amamaluina le malumalu poo le falesa, ona o le fale o le Atua.

GALUEGA FA'ATINO: FA'ATINO LE TALA

Ia fa'amatala le tala, ma fa'ailoa i le vasega ina ia fa'alogolelei ma maitau, ona a mae'a ona fa'amatala, ona fa'atino lea e le vasega. E mafai ona fa'aaoga upu o loo tautala ai o loo i tusi Paia, pe fa'aaoga foi ni upu faigfie.

PESE: Pa'i mai nei le Alii e (Touch me Lord....)
 Pa'i mai nei, le Alii e, o lou mana
 Pa'i mai nei le Alii e, o lou Agaga
 Pa'i mai nei ia lē aunoa
 Ia saga pa'i mai fa'asolo atoa
 Pa'i mai nei, fa'atumu a'u i lou oa.

A'OA'OGA"

1. Ia iloa o le malumalu, e mo le Atua ma sauniga ia te Ia.
2. Ia fiafia e tatalo ma tapua'i i le Atua.

.....

ASO SA: 8 MATI 2026

MATAUPU: O LE AIGA MULIMULI

SINI: Ia malamalama le vasega, i le uiga ma le tāua o le aiga mulimuli a Iesu ma lona au soo.

TUSI FAITAU: Mataio 26:17-30

FESOASOANI MO FAIAOGA:

O taimi o taumafataga e mafai ona avea ma taimi e fa'amalosia ai le mafutaga ma le fa'amanatuina o mea tāua na tutupu. O le aiga mulimuli a Iesu faatasi ma ona soo, o se mafutaga na saunia lava e Iesu e fa'ailoa ai lona sauni e maliu. O le aiga poo le sauniga na faamanatu ai le Paseka, ae na suia e Iesu le uiga o le 'ai i le falaoa ma le uaina, e fai ma faamanatuga i lona tino ma lona toto.

O le taimi o le Paseka, o se aso sili ona tāua mo tagata Iutaia e faamanatu ai le laveaiina o i latou mai Aikupito (Esoto 12). Na faatonuina e Iesu ona soo e sauni se potu mo le taumafataga o le Paseka. I lea taumafataga, na ia faailoa atu ai le faalata o Iuta, ma suia ai le tala'aga o le taumafataga ina ia avea ma faamanatuga i lona maliu.

O le ala lea o le fa'aigoaina o le mafutaga lea a Iesu ma ona soo, o le "aiga mulimuli", ona o le taumafataga mulimuli a Iesu ma ona soo, a'o aga atu o Ia mo lona fa'asatauroina ma lona maliu.

E lē o manatu o se mafutaga mulimuli, ona lē toe mafuta lea. Peita'i, o le aiga mulimuli i totonu o le mafutaga fa'a-le-tino, o le va'ai atu ma le silasila mai, i le so'otaga fa'a-le-tagata.

O le tāua ia Iesu o lea aiga mulimuli ma ona soo, ina ia fai ma fa'amanatu i lona ausoo i se taimi mulimuliane, le uiga ma le tāua o lea aiga mulimuli. O lea lava ua oo mai i o tatou taimi, o loo fa'amanatuina ai lava e le au Kerisiano le paseka, o le alofa tunoa o le Atua e ala ia Iesu Keriso, e pei ona Ia maliu ma toetu manumalo mai ai.

Uiga o Upu:

- i) Areto/Falaoa — fa'atatauina i le tino o Iesu ("O lo'u tino lea.")

- ii) Uaina – o loo fa’atautaina i le toto o Iesu
 (“O lo’u toto lea o le feagaiga fou.”)

E fesoasoani leni i tamaiti e malamalama ai i le Sauniga Paia i aso nei.

GALUEGA FA’ATINO: TUSIGĀ ATA

Falaoa & Uaina – Fa’ailoa i ata.

Mea e Manaomia: Pepa, peni, vavae pepa, vali, etc.

Fa’atonuga:

Fai ata o le falaoa ma le ipu uaina. Tusitusi i lalo: “*O lo’u tino lea... O lo’u toto lea...*”

Ave e fa’apipi’i i le fale e faamanatu ai le fa’amoemoe o le Sauniga Paia.

PESE: Do Lord (or Way Beyond the Blue)
 I've got a home in glory land that outshines the sun
 I've got a home in glory land that outshines the sun
 I've got a home in glory land that outshines the sun
 Way beyond the blue

Chrous: Do Lord, oh do Lord, oh do remember me.
 Do Lord, oh do Lord, oh do remember me.
 Do Lord, oh do Lord, oh do remember me-way beyond
 the blue.

I took Jesus as my Savior, You take Him too.
 I took Jesus as my Savior, You take Him too.
 I took Jesus as my Savior, You take Him too,
 Yes! He's Calling you.

A’OA’OGA:

1. Ia lagonaina le tāua o le mafuta ma Iesu.

2. E fa’ailoa mai lava e le Alii lona alofa i ona tagata.
3. Ia manatua Iesu i taimi uma tatou te aai ma feinu ai.

.....

ASO SA: 15 MATI 2026

MATAUPU: O LE TATALO A IESU I KETESSEMANE

SINI: Ia malamalama le vasega, na tatalo Iesu i lona
 Tamā e fesoasoani mai ia te Ia ma ona tīgā.

TUSI FAITAU: Mataio 26:36-46

FESOASOANI MO FAIAOGA:

Ina ua uma le Aiga Mulimuli a Iesu ma ona soo, na o ai Iesu ma ona soo i se nofoaga o lo’o ta’ua o Ketese mane, o se vao i luga o le Mauga o Olive. O le faamoemoe o Iesu i lea afiafi, o se taimi paganoa mo Ia e fia tatalo ai i le Atua lona Tamā. O se tasi o taimi sili ona faigatā i le olaga o Iesu, a’o lumanai lona pu’eina, sasa, ma le faasatauroina.

Na ave e Iesu soo e to’asefululua i le vao, ae na vavae ese ai ma i latou e to’atolu (Peteru, Iakopo ma Ioane) o ana uo mamae. Na fetalai atu Iesu ia i latou: “Ua tiga lo’u agaga e pei lava o le oti...” Ua fa’aali manino i le uiga o nei upu le mafatia o Iesu. Ua le o le tino na muamua tiga, ae o le agaga.

“Lo’u Tamā e, afai e mafai, ia aveesea leni ipu mai ia te a’u; a ia lē faia lo’u finagalo, a ia faia lou finagalo.” O le “ipu” o lo’o ta’ua e Iesu, o le tiga, ma le faasalaga o le agasala o le lalolagi, lea o le a ave e Iesu i luga o Ia i le koluse (satauro). E le’i faatonuina e Iesu le Atua lona Tamā, ae na tatalo ma le usita’i, “ia faia lou finagalo”. O le fa’ata’ita’iga sili lea o le lotomaulalo ma le faamaoni.

Na toe foi Iesu i ona soo, ma maua atu o loo momoe. E faatolu o na toe foi atu Iesu ma iloa i latou o loo momoe. Na fa'apea atu Iesu: "E mataala ma tatalo, o le agaga e naunau, a o le tino e vaivai."
 O le fa'atonuga lenei e le gata mo ona soo, ae mo tatou uma – e tatau ona mataala i le agaga ma faamalosi i le tatalo, auā e vaivai le tino.
 Ua le toe moe Iesu, ua Ia sauni e feagai ma le satauro. O le tatalo na fa'amalosia ai Lona loto e tali atu i Lona vala'auina.

Uiga o Upu:

Ketesemane: *o se nofoaga e tetele ai olive — o le nofoaga e tatalo ai Iesu.*

Soo e moe: *E fa'aalia ai lo latou le malamalama i le mamafatū o le avega sa feagai ma Iesu. E fa'amanatu mai i tatou ina ia aua ne'i pa'ū i le moe faale-agaga.*

GALUEGA FA'ATINO: TATALO

Ia tuu le avanoa i tamaiti latou te tusia ai lava e le tagata ia lanai a Tatalo. A mae'a ona tuu lea o le avanoa latou te fa'aleoina ai lana tatalo na ia tusiaina. O le fa'amoemoe o lea galuega, ina ia fa'amasani tamaiti i le ola tatalo.

PESE: Fai sau tatalo i le taeao. (Whisper a prayer...)
 Fai sau tatalo i le taeao
 Fai sau tatalo i le ao
 Fai sau tatalo i le po
 E fa'afiafiaina ai lou lotō

Whisper a pray'er in the morning,
 Whisper a pray'r at noon;
 Whisper a pray'r in the ev'ning,
 To keep your heart in tune.

God answers pray'r in the morning,
 God answers pray'r at noon;
 God answers pray'r in the ev'ning,
 To keep your heart in tune.

Jesus may come in the morning,
 Jesus may come at noon;
 Jesus may come in the ev'ning,
 So keep your heart in tune.

A'OA'OGA:

1. Ia fa'amasani i le tatalo i soo se taimi.
2. O le tatalo o le auala lea e toe faafou ai le malosi o le agaga.
3. E mafai ona tatou fai atu i le Atua mea o lo'o i totonu o o tatou loto, e ui o le fefe, tiga, po o le fa'avaivai.

.....

ASO SA: 22 MATI 2026

MATAUPU: O LE FA'ALATAINA MA LE PU'EINA O IESU

SINI: Ia malamalama le vasega, ua silafia lava e Iesu lona fa'alataina ma lona pu'eina, ma ua Ia sauni lava i ai.

TUSI FAITAU: Mataio 26:47-56

FESOASOANI MO FAIAOGA:

O le ola fa'alata o le tagata, e lē o se tu ma se amio e lelei. O le isi lea uiga o le tagata e ola fa'afoliga. E foliga mai i le filemu, ae matagā le

amio ma ana fa'atinoga. O le tala o lenei aso Sa, o loo fa'amamafaina ai le nofo sauni o lo tatou Alii o Iesu, e tali i le fa'alata ma le pu'eina o Ia. E le'i sola Iesu mai le faalataina, aua sa Ia iloa o le ala lea e faataunuu ai le finagalo o le Atua mo lo tatou fa'aolataga. A o lei uma le talanoa atu a Iesu i ona soo, na sau ai Iuta, o le tasi o le to'asefululua, ma le motu o tagata e to'atele, o lo'o ave a latou pelu ma uatogi. Na tuuina atu e Iuta le faailoga i le 'au leoleo: "O lē ou te sogi i ai, o Ia lea." Na alu atu Iuta ma sogi atu iā Iesu ma faapea atu: "Rapi e, si o'u alofa" Na fetalai i ai Iesu: "Sole, se a le mea ua e sau ai?"

E oo lava i le taimi o le faalataina, sa tumau lava Iesu i le agalelei ma le filemu o lona loto. Na toso e se tasi soo lana pelu ma tipi ese ai le taliga o le auauna a le ositaulaga sili. Ae na fetalai atu i ai Iesu, ina ia toe sulu lana pelu i lona fa'amoega. Auā o i latou uma o e tago i le pelu, e oti i latou i le pelu.

Na toe faamanatu atu e Iesu, e mafai lava ona Ia valaau i lona Tamā ina auina mai nisi e tau mo Ia. O loo fa'atusaina le to'atele o agelu e sili atu i le 12 lekeona. Ae o le lekeona, o le igoa lea o le au e ono afe. O lona uiga, afai e tasi le lekeona e tusa lea ma le ono afe, ona fa'atele lea i le sefululua o lekeona, o lona tuufaatasiga e fetusefulu ma le lua afe.

Peita'i, e le fa'aaogāina e Iesu le sauā e tau i ai le leaga, ona e usita'i i le finagalo o le Atua.

Na fetalai Iesu: "O lea na outou sau ai i le pelu ma le au e pei o se tagata gaoi... A o aso uma sa ou aoao i le malumalu, ae e le'i pu'eina ai a'u." O le Atua ua silafia uma nei mea, e oo lava i le sosola ese o soo. Ae tumau pea Iesu e le sola, e le fefe, e le tau i atu. Ae na Ia tali lava ma le filemu.

Ioe Tamaiti A'oga aso Sa, e le o faafuase'i ia Iesu le faalataina o Ia. Ua silafia lelei e Iesu, ona o le vaega o le fuafuaga a le Atua mo le faaolataga.

GALUEGA FAATINO: Fa'ata'ita'i le Tala (Drama Skit)

Tagata e Manaomia:

Iuta, Iesu, Soo (e to'atasi e tipi le taliga), auauna a le ositaulaga, motu o tagata


Fa'atonuga: Fai se ata e toe faamatala ai le tala, ae ia manatua le uiga moni: E le tauivi Iesu i le malos, ae i le ususita'i.

PESE: Oh, how I love Jesus
There is a Name I love to hear,
I love to sing its worth;
It sounds like music in my ear,
The sweetest Name on earth.


Ch: Oh, how I love Jesus,
Oh, how I love Jesus,
Oh, how I love Jesus,
Because He first loved me!
It tells me of a Savior's love,
Who died to set me free;
It tells me of His precious blood,
The sinner's perfect plea.

O How I Love Jesus


601




1. There is a name I love to hear, I love to sing its worth;
 2. It tells me of a Sav-ior's love, who died to set me free;
 3. It tells of one whose lov-ing heart can feel my deep-est woe;



it sounds like mu-sic in my ear, the sweet-est name on earth.
 it tells me of His pre-cious blood, the sin-ner's per-fect plea.
 who in each sor-row bears a part that none can bear be-low.



O how I love Je-sus, O how I love Je-sus,



O how I love Je-sus, be-cause He first loved me!

WORDS: Frederick Whitfield, 1855
 MUSIC: American melody, 19th cent.

O HOW I LOVE JESUS
 CM with refrain

A'OA'OGA:

1. E mafai ona tatou agalelei i ē e faatupu tiga i o tatou olaga.
2. E leaga le ola tau-faalata.
3. E lē tatau ona tatou tali atu i le ita i le ita, auā ua aoao mai e Iesu le faamagalo ma le filemu.
- 4.

.....

ASO SA:

29 MATI, 2026 (ASO SA LAUPAMA).

MATAUPU:

UA LATOU FOLA LAUPAMA LE ALA

SINI:

Ia malamalama tamaiti i le tāua ma le faamoemoe o le malaga a Iesu i Ierusalem.

TUSI FAITAU:

Luka 19:36-40.

FESOASOANI MO FAIAOGA:

O le aso Sa lenei o loo fa'atauaina e le Kalena a le au Kerisiano i le lalolagi, o e ua talitonu i le Talalelei ia Iesu Keriso. O nisi ua na o le fa'amanatu i le avefa ma aso Sa o le Laupama, a'o nisi ua le gata i le fa'amanatu, ae sili ai ona lagonaina o le tāua i le loto. O le malaga a Iesu i Ierusalem, o le malaga o le manumalo ia poo le malaga faatupu. O le malaga e pei ona molimauina e le au fai Evagalia faimai ua fola e tagata lau pama atoa ai ma o latou ofu i le ala, ao tietie atu Iesu i le tamai asini agai i Ierusalem, ma motu o tagata o loo alalaga, "Osana, osana, osana i le Alo o Tavita, Ia manuia le Afio mai i le Suafa o le Alii".

O le to'atele o ia tagata, o tagata Iutaia o loo tumutumu i le laumua i Ierusalem, aua le faamanatuina o le tausamiga o le paseka. O nisi sa o latou molimau i le tele o vavega na faia e Iesu ma ua talitonu i ai. Ma o le ala foi lea o lo latou tauvalaau ma alalaga. O le pisapisao ai la o nei

tagata ma alalaga, na ala ai ona fai atu le au faresaio ia Iesu, e na te vavao ia te'i latou. Peitai ua fetalai atu Iesu ia te'i latou, afai e le alalaga i latou nei, e mafai lava e maa ona alalaga mai.

O le manatu o le toatele o tagata Iutaia na i ai, o le taunuuga lava lea o le afio mai o lo latou Mesia na valoia e perofeta. Peitai, e ese le agaga lea o lo o latou mananao i ai. O lo latou manao ia afio mai so latou Mesia i se tulaga o le malosi faafitafita e pei o Tavita, e na te taitaia taua, ma toe faaeaina lo latou pologa, ma ia toe faasao ma laveai mai i latou mai sauaga a isi malo e pei o le malo Roma. Peitai, e sao ai le molimau a Isaia, "Isaia 55:8-9", "o outou manatu e le o o'u manatu ia". O loo mafuli manatu o tagata Iutaia, i malo faapolokiki i le lalolagi nei, a'o malo ia e mavae, e le tumau, peitai o le malo o le Atua, o le malo lava e taunuu i le ola e faavavau, lea e nofotupu ai le Alii o Iesu. O le ala lea o le ese ai lava o le faamoemoe o le Alii o Iesu i lana malaga i Ierusalema mai manatu o tagata Iutaia.

O le fola ai la o laupama i le ala, o se tu fa'aaloalogia a tagata, e fa'aaloalogia ai le afio atu o le tupu o tagata uma i le lalolagi, auā o Iesu lava o le Tupu.

GALUEGA FAATINO: FAATINOGA

Faatino le tala sa faitauina mai le Tusi Paia

PESE: Osana pepese tamati uma

A'OA'OGA:

1. O Iesu lava o Ia le tupu i le malo o le lagi.
2. Ua teena ma lē talia e tagata le afio mai o le Mesia.
3. Ia fai Iesu ma o tatou Tupu tatou te tumau ai.
- 4.

.....

MANATU TA'IALA APERILA: "O LE FA'AOLATAGA MO TAGATA UMA"

O lenei masina o loo amata lava le aso Sa i le fa'amanatuina o le toetu mamalu mai o lo tatou Alii o Iesu Keriso i le tuugamau. O le taunuuga ma le atoaga o le Fa'aolataga na Ia tapena mo le lalolagi uma lava. Mo i tatou uma, e ao ona tatou lagonaina le tāua ma le aogā i o tatou olaga, ma ia atagia i le olaga o aso uma.

ASO SA: 5 APERILA 2026

MATAUPU: E LĒ O I'INEI O IA, AUĀ UA TOETU MAI O IA (Aso Sa Toetu).

SINI: Ia malamalama le vasega ua leai se tino maliu o Iesu i le tu'ugamau, auā ua toetu manumalō o Ia nai le oti.

TUSI FAITAU: Ioane 20:1 - 10

FESOASOANI MO FAIAOGA:

O le Aso Sa lenei ua tatou fa'amanatuina ai le Toetu manumalo o lo tatou Alii Fa'aola o Iesu Keriso, e pei ona masani ai i tausaga uma. O le totonugālemū lea o lo tatou fa'atuatuaga i le Atua, o le maliu ma le toetu o Iesu Keriso mai le oti ma le tu'ugamau. O le ala foi lea tatou te fa'amanatuina ai lava i tausaga uma lenei aso Sa tāua, ina ia o tatou manatua ai pea le alofa mai o le Atua, ma le fa'aolataga tele e pei ona maliu ma toetu manumalo mai ai lo tatou Alii o Iesu Keriso.

O tala i le toetu manumalo o lo tatou Alii o Iesu Keriso i lenei aso Sa, ua fa'aaogaina ai le molimau a Ioane. O le ulua'i aso o le vaisapati i le vaveao, na alu ai Maria le Makatala e asi le tu'ugamau o Iesu. Na va'aia e Maria ua leai se ma'a sa i le faitotoa o le tu'ugamau, ona ia tamo'e atu ai lea ma va'ai i totonu o le tu'ugamau, ua leai se tino maliu o Iesu.

Ona toe tamo'e lea o Maria ma ta'u atu i nisi o so'o o Iesu, o Simona Peteru ma le tasi so'o na alofaina e Iesu. Ua latou o atu fa'atasi ma so'o i le tu'ugamau ma iloa ai ua na o 'ie na ufi ai le tino o Iesu, a ua leai sona tino i le tu'ugamau. Ua le mautonu nei so'o ma Maria po'o ai ua ave'eseina le tino maluu o lo latou Alii o Iesu. Peita'i o le taimi lea, e le'i iloa e so'o ma Maria, o Iesu ua toetu manumalo o Ia mai le oti ma le tu'ugamau.

Ua toe foi nei so'o i o la aiga, a'o Maria ua nofo ai pea o ia i le tu'ugamau ma tagi ai. A'o i ai Maria i le tu'ugamau ma le fa'anoanoa, sa ia fa'alogoia le leo o le tagata ua fesili atu ia te ia, pe aisea ua tagi ai. E le'i iloa e Maria o Iesu lea ua fesili atu ia te ia. Na fa'atoa iloa lelei e Maria o Iesu ina ua ta'u atu e Iesu lona igoa o Maria. Na matua fa'ateia Maria ina ua ia tilotilo lelei atu o Iesu lea la te talanoa. Ua toetu o Ia. Ioe tamaiti, ua leai se tino o Iesu i le tu'ugamau, ua le o i ai o Ia i le tu'ugamau, a ua toetu o ia mai le oti.

Na tamo'e fiafia Maria ma ta'u atu i so'o o Iesu ua toetu Iesu. O le tala fiafia lea mo i latou ae fa'apea foi le lalolagi atoa. E ui i puapuaga sa feagai ma Iesu, ae le'i mafai ona to'ilalo ai lo tatou Alii Fa'aola. O le maluu ma le toetu mai o Iesu, o lona alofa ina ia fa'aolaina i tatou le fanau agasala. E a tamaiti? Pe talafeagai le agasala o le lalolagi ae oti ai fua Iesu?

Uiga o Upu:

- i) vaisapati : o le aso muamua ina ua uma le sapati.
- ii) ofu sisina: ofu papa'e

GALUEGA FA'ATINO: FA'ATINO LE TALA

Ina ia mautinoa e faigofie ona manatua e tamaiti le tala, e matua tataua ai ona taumafai e fa'atino le vaaiga lea o le tala i le mea na tupu i le toetu, i le tala a Ioane.

PESE: Pese #51 (Tusi Pese)

A'OA'OGA:

- 1. O le toetu o Iesu Keriso o le Talalelei lea mo le lalolagi atoa.
- 2. Ua fa'aolaina le tagata agasala ma le lalolagi i lona alofa tunoa.
- 3. Salamō ma fa'atuatua fa'amaoni i le Alii ma lana talalelei e le aunoa.

.....

ASO SA: 12 APERILA 2026

MATAUPU: O LE LAGI FOU MA LE LALOLAGI FOU

SINI: Ia malamalama le vasega, o le tagata ua ola i le olaga fou mai le Atua, e mautinoa lona i ai i le lagi fou ma le lalolagi fou.

TUSI FAITAU: Fa'aaliga 21:1-8

FESOASOANI MO FAIAOGA:

O le lagi fou ma le lalolagi fou, e le fa'atatauina i se isi foafoaga fou na toe faia e le Atua faapei o le tala i le foafoaga i le amataga. O loo manino i le tala o le foafoaga, na faia e le Atua le lagi ma le lalolagi fou i lona lava mana, ma sa matua lelei ma matagofie mea uma lava. Peita'i ina ua le usita'i le tagata ma ua fia Atua, ona leaga ai lea ma ua fa'atumuina le lalolagi i le agasala. Ua fai ma ala ua fiafia ai lava ma le tagata e ola i le leaga. Ma o le ala lea na finagalo ai le Atua, ina ia toe fai se auala e fa'afouina ai le ola o le tagata, ma avea o se olaga fou i se lalolagi fou. O le mataupu o lenei sao Sa, o loo manino mai ai, ua folafola mai e le Atua se nofoaga fou mo e faamaoni ia te Ia. O lea nofoaga e leai se tagi, leai se tiga, ae tumu i le olioli ma le filemu. O le ata o lea nofoaga, na iloa e Ioane e ala i se fa'aaliga.

Fai mai le tala, na vaai le aposetolo o Ioane i se lagi fou ma se lalolagi fou, auā ua mavae atu le lagi ma le lalolagi tuai. Na ia silasila atu fo'i i le aai paia, o Ierusalem fou, o lo'o sau mai le lagi, e sau mai le Atua. O ona foliga e pei o se fa'ato'aga ua saunia mo se faaipoipoga. O le ata vaaia lea e iloa ai, e le tumau lenei lalolagi. Ua saunia e le Atua se nofoaga fou ma lelei atoatoa mo tagata faamaoni. O le folafolaga a le Atua na faalogo ai Ioane i se leo malosai mai le nofoalii.

O se nofoaga ua folafola mai le Atua e nonofo faatasi ai ma Lona nuu, e solo ese ai o latou loimata uma. E leai se oti, leai se tagi, leai se tiga. E pei o se parataiso fou, e faavavau le fiafia ma le filemu. O loo manino i le fetalai mai o le Atua, "Faauta, ou te faia mea fou uma." O lē e fia inu, o le a avatu fua i ai le vai o le ola. O lē e manumalo, e fai ma atalii o le Atua ma fai le Atua ma tamā mo ia. O le tau mo i latou e faamaoni i le Atua, e maua le tau tele i le faavavau. Peita'i, o loo tuuina faatasi ai ma se lapataiga mo i latou e lē faatuatua, pepelo, amioleaga, ma le ususita'i, o le a o atu i le mumu o le afi, o le oti e fa'avavau.

O lona uiga, e taua le filifili o le tagata i le olaga i le Atua, aua o lo'o i ai le tau ma le sala. Ua saunia e le Atua se nofoaga fou mo i tatou.

O le lagi fou ma le lalolagi fou e tumu i le filemu, le alofa, ma le olioli. O le fa'amanatu mo i tatou uma lava o tagata na faia e le Atua, ina ia tatou ola faamaoni. E tatau ona tatou faamaoni i le Atua i le taimi nei, e maua ai le avanoa i lona Malo fou. Ua folafola mai le Atua: "Ou te faia mea fou uma." E mafai ona suia le tagata, sui mai i le agasala, i le ola fa'apaiaina. O le uiga lea o le "lagi fou ma le lalolagi fou" o le mataupu o lenei aso Sa.

O foliga o le aai paia na vaai i ai Ioane, o foliga na o le olaga mo le tagata e fiafia e ola i le Atua i se olaga fou ma mamā. A o tatou ola suia i le taimi nei, mai le leaga i le lelei, ona mautinoa lea lo tatou i ai i le lagi fou ma le lalolagi fou.

GALUEGA FAATINO:

A: TUSGA ATA.

Ata: "Lagi Fou – Lalolagi Fou"

Mea e mana'omia: pepa, peni, vali.

Fa'atonuga: Fai se ata o le lagi fou e pei ona faamatalaina i le Fa'aaliga 21 – e leai ni loimata, e fiafia tagata, e susulu le malamalama, e leai se mala.

E: TUSIGA POSTER

Mea e moomia: pepa lapoa, pepa laiti, peni maka.

Fa'atonuga: Ia tusia i pepa laiti ni upu po o ni folafolaga o le Atua mai i Fa'aaliga 21:

"Leai se loimata", "Ou te faia mea fou uma", "O le vai o le ola", "E nofo le Atua ma i latou", "E leai se oti".

Ia tuufaatasia i se pepa lapo'a (cardboard)

PESE: I've got the joy, joy, joy, joy down in my heart.

I've got the joy, joy, joy, joy down in my heart

Where?! Down in my heart! (x2)

I've got the joy, joy, joy, joy down in my heart

Down in my heart to stay

Chorus And I'm so happy, so very happy
I've got the love of Jesus in my heart
Down in my heart.
And I'm so happy, so very happy
I've got the love of Jesus in my heart.

I've got the love of Jesus, love of Jesus down in my heart
Where?! Down in my heart! (x2)

I've got the love of Jesus, love of Jesus down in my heart
Where?! Down in my heart to stay.

A'OA'OGA:

1. O le fa'afouina o le ola, o le ola lava lea i le lagi fou ma le lalolagi Fou.

2. Ua na le Atua lava tatou te maua ai le ola fou.

.....

ASO SA: 19 APERILA 2026

MATAUPU: O IONA MA LE ALOFA TUNOA O LE ATUA

SINI: Ia malamalama le vasega, na lē usita'i Iona ae na alofa lava i ai le Atua.

TUSI FAITAU: Iona 1:1-17

FESOASOANI MO FAIAOGA:

E le mafai ona tatou sosola ese mai le Atua, o lē na faia i tatou. Ae afai foi ae manatu se tasi e sola ese mai le Atua, e tumau lava lona alofa, auā o lona alofa tunoa e sili atu nai lo tatou lē usiusita'i.

Na fetalai le Atua iā Iona e alu i le aai tele o Nineva ma tala'i atu lona finagalo i le nuu. O le finagalo o le Atua, o le a faasala i latou i a latou amioleaga. Na alu Iona i le vaa aga'i i Tasesa, a ua le o Nineva. Na ia manatu e mafai ona sola ese mai le fofoga o le Atua.

Na tuuina e le Atua se matagi malosi, ua luluina ai le vaa, ma ua matua fefefe ma le au-va'a. Sa tatalo tagata uma i o latou atua, ae o loo moe lava Iona i lalo o le vaa. Na iloa e tagata le pogai o le matagi o loo ua sou ai le sami, o Iona. Ma o le ala lea na ia manatu ai lava, ina ia lafo o ia i le sami. E ui na solitulafono Iona, na faailoa ai lava e le Atua lona alofa ma faasao ai le vaa ma tagata. O le alofa o le Atua na Ia tofia ai se i'a tele e na te foloina ai Iona, ma nofo ai o ia i le manava o le i'a mo aso e tolu ma pō e tolu. E mafai e le Atua ona fa'aaoga so'o se mea e toe aumaia ai i tatou i lona finagalo, e pei o le i'a tele sa nofo ma ola fialia i le sami loloto.

I totonu foi o lenei tala, o loo matuā manino mai ai, e matuā lē mafai, lē mafai ona tatou sola ese mai fofoga o le Atua. O le sola ese o Iona, o le fa'atinoga lava lea o le lē usita'i i le fa'atonuga a le Atua. Ae o le lē usita'i, o le filifiliga lava lea i puapuaga ma faigata. O lo tatou le usita'i, e aumaia ai faigatā. Peita'i o le Atua e alofa pea, e alofa pea ma tuu avanoa i le tagata ina ia salamo. E fa'aali e le Atua lona alofa tunoa i le taimi tatou te lē usiusita'i ai.

E le'i faasalaina Iona i le taimi na lē usita'i ai, ae na alofa i ai le Atua ma a'oa'oina ina ua i ai i le manava o le i'a. E mafai e le Atua ona fa'aaoga faafitauli e toe aumaia ai i tatou i le ala sa'o e tataua ona tatou fai, e tusa ma lona finagalo.

GALUEGA FA'ATINO: Fesili mo Talanoaga

1. Aiseā na sola ese ai Iona mai le valaauga a le Atua?
2. O le ā na tupu ina ua alu Iona i le vaa?
3. Na faapefea ona faasaoina Iona?
4. O le ā le uiga o le “alofa tunoa” a le Atua i lenei tala?
5. Ua e lagona se taimi na e sola ese ai i le mea sa tataua ona e faia?

PESE: O le alofa o le Atua e ofoofogia
God's love it's so wonderful
God's love it's so wonderful
God's love it's so wonderful
Oh! Wonderful love!

So high you can't get over it
So high you can't get over it
So high you can't get over it
Oh! Wonderful love!

So deep you can't get under it
So deep you can't get under it
So deep you can't get under it
Oh! Wonderful love!

So wide you can't get around it
So wide you can't get around it
So wide you can't get around it
Oh! Wonderful love!

A'OA'OGA:

1. E tumau le alofa o le Atua, tusa lava pe tatou te leaga.
2. Tatou te feagai ma puapuaga pe a lē usita'i i fa'atonuga uma.

.....

ASO SA: 26 APERILA 2026

MATAUPU: O LE TAGATA PUAPUAGATIA

SINI: Ia malamalama le vasega, o Iesu o Ia lava o le Mesia, o Ia lava o le tagata puapuagatia.

TUSI FAITAU: Isaia 53:1–12

FESOASOANI MO FAIAOGA:

O le tala i le Isaia e 53, o se tasi o valo'aga sili ona tāua i le Tusi Paia e faatatau i le Mesia. Ua ta'ua ai le “Tagata Puapuagatia,” e lē o se tagata e foliga matagofie i luma o tagata, ae o lē e aveina i luga o ona lava a'ao a tatou agasala ma tiga. O le fuaiupu e amata i le fesili, o loo fesiligia ai e ua talitonu i le tala ua ta'uina mai, a'o ai foi ua faaalua i ai

le a'ao o le Alii. O se fesili e iloa ai, e to'atele tagata e le talitonu i le Mesia pe a oo mai.

O lenei “Tagata Puapuagatia” e faamatalaina o lē e teena e tagata, e lē amana'ia, ma e momomo lona loto ona o le tele o tiga ma mafatiaga. E le o ni ana lava agasala na Ia puapuagatia ai, ae ona o a tatou agasala uma. O loo faailoa i le fuaiupu e 5, e manu'a o ia (Mesia) ona o a tatou solitulafono, ua nutimomoia o ia ona o a tatou agasala.

O le valo'aga lenei e sili ona manino i le Tusi Paia e faasino sa'o i le galuega a Iesu Keriso i luga o le satauro. E ui na tusia e Isaia le perofeta i le silia i le 700 tausaga ae le'i fanau mai Iesu, ae o nei upu e foliga mai o se tala tuusa'o i le taimi na maliu ai Iesu. Na faamaonia e le Au Aposetolo i le Feagaiga Fou o Iesu o le “Tagata Puapuagatia” lea o loo faamatalaina. (Mataio 8:17; 1 Peteru 2:24–25).

O lenei mataupu e le gata o se fa'aaliga o le alofa tele o le Atua, ae o se valaau mo tagata uma e talitonu ma tali atu i le meaalofa o le faaolataga na maua i le maliu o Keriso. Ma o le fa'atatau lea o le mataupu o lenei aso Sa, ua tatou iloa ai, o le tagata puapuagatia, o loo fa'atatauina ia Iesu, o lē na puapuagatia ona o i tatou o tagata leaga ma agasala. Ua manino mai ai foi, na mafua ona puapuagatia si Alii o Iesu, ona o i tatou uma lava o tagata. Poo e iloaina, ua tigā Iesu ona o i tatou uma?

GALUEGA FAATINO:

A: TATALO

Tusi se tatalo faafetai: Ia tusi e le tamaitiiti se tatalo faafetai i le Atua ona o le maliu o Iesu mo ia ma lona aiga, ma tagata uma.

E: TUSIGA ATA:

Tusi pe vali se ata e fa'aalia ai le faailoga o le alofa o Iesu i luga o le satauro.

I: SU'EGA TUSI

Ia su'e ma tusi i lalo isi fuaiupu i le Feagaiga Fou e faamaonia ai le Isaia e 53 sa faitauina (*faata'ita'i: 1 Peteru 2:24; Mataio 8:17; Roma 5:8*).

PESE: Jesus loves the little children

Jesus loves the little children
All the children of the world; Red and yellow, black and white,
They are precious in his sight; Jesus loves the little children of the world.

Jesus died for all the children,
All the children of the world; Red and yellow, black and white,
They are precious in his sight; Jesus died the little children of the world.

Jesus rose for all the children,
All the children of the world; Red and yellow, black and white,
They are precious in his sight; Jesus arose the little children of the world.

Jesus wants the little children,
To be careful what they do; Honor father, mother dear
Keep their hearts so full of cheer; Then he'll take them home to glory by and by.

A'OA'OGA:

1. O Iesu lo tatou Alii na puapuagatia ona o i tatou.
2. Aua tatou te faatigā i lo tatou Alii.

3. Ia tatou talitonu, o Iesu na fa'aolaina i tatou.

.....

MANATU TA'IALA ME: "O TAPENAGA MO SE SUIGA"

O le olaga o loo tatou ola ma soifua ai, e moomia le fa'afouina ma saga fa'aleleia. O suiga lelei na e tataou ona tapena i ai soo se tagata. O le upu moni, e toa'ele nisi latou te le o sauni ma tapena mo ni suiga. E i ai foi nisi ua lē lelei o latou suiga, ona ua sui mai le lelei i le leaga. Mo lenei masina, ua fa'ataua matupu mo tapenaga o suiga lelei mo le olaga o aso uma.

ASO SA: 3 ME 2026

MATAUPU: O LE PAPATISOINA O IESU

SINI: Ia malamalama le vasega, o le papatisoina o Iesu, o le fa'ata'ita'iga lelei o le tapenaga mo le tagata.

TUSI FAITAU: Mataio 3:13-17

FESOASOANI MO LE MATAUPU:

O le papatisoga, o le sauniga mo le fa'amamāina o le tagata. O le fa'amoemoe sa tapenaina lava e Atua, ia mo tagata uma ina ia ola fa'apaiaina. O le tofiga lea na filifiliaina ai le toaina o Ioane, auā le fa'amamaina o tagata ua o latou talia Iesu ma ua talitonu i le Atua e ala ia Iesu.

Na sololelei le fa'atinoga o le galuega a Ioane, ae ina ua mavae masina e ono (6) talu ona amataina lana galuega faa-papatiso, na maliu atu ai Iesu mai Nasareta i Ioritana, ina ia papatisoina o Ia e Ioane, o le na

muamua atu e saunia ma teuteu le ala mo le Mesia. Ina ua afio atu Iesu ma feiloa'i ma Ioane, sa tupu ai le fete'ena'iga i le loto o Ioane, ona o le manatu o Ioane, e le tatau ia te ia, ona ia tatala manoa o see-vae o Iesu, aua o Iesu le Mesia, o le na te papatisoina tagata uma i le agaga ma le afi, e aveese ai aga-sala a le lalolagi atoa. Peitai, sa fetalai Iesu ia Ioane, "Tuu mai pea ia, aua e tatau ia te i tatou uma ona faataunuaina mea tonu uma". O le finagalo o le Alii e le'i sau e papatiso ona e agasala, ae ona o lona usita'i i le finagalo o le Atua. Ia fai ma faata'ita'iga lelei mo isi tagata.

O se vaaiga mata'utia e saga fa'amautuina ai lava, o Iesu o le Alo o le Atua, na iloa ina ua fa'atino le papatisoina o Iesu. Fai mai na avanoa le lagi, ma afio ane le Agaga Pa'ia, ua tino mai pei se lupe, ua oo i ona luga. E le gata i lea, a'o le motu o tagata ua latou faalogo i le leo, o le siufofoga mai le lagi, ua faapea mai, "O lo'u atalii pele lena, ua o'u fiala lava ia te Ia".

O le tuleiga ma le malelega a le tatou Atua ina ua papatisoina Iesu lona atalii pele e to'atasi, e tapena ai mo lana galuega faaola mo tagata uma ma le lalolagi atoa ina ia faaolaina i tatou uma i lona malo e faavavau. Mo i tatou le fanau, ina ua fananau mai i tatou, na ave ai tatou e o tatou matua i faifeau ina ia papatiso i tatou. O le fa'amoemoe ina ia fa'apaiaina i tatou uma lava, ona e lē tatau ona tatou ola i le lalolagi, ae le'i fapaiaina i tatou, ma ta'ua i tatou o sui i le aiga o Keriso.

O le feau mo i tatou uma, afai na finagalo le Alii o Iesu ina ia papatisoina o Ia, e ui e leai sona leaga, o lona uiga, o ai tatou o le a lē papatisoina ai? Tapena o tatou loto ma agaga mo lo tatou Alii Faaola.

GALUEGA FAATINO: 1. Fesili mo Talatalaga

- I. Aiseā na sau ai Iesu i le vaitafe o Ioritana?
- II. Aiseā na teena ai e Ioane le papatisoga mo Iesu?
- III. O le ā le uiga o le tali a Iesu: "e tatau ona faataunu'u mea amiotonu uma"?
- IV. O le ā le faamaoniga mai le Atua ina ua uma le papatisoga?

V. E faapefea ona tatou faailoa le usiusita'i i le Atua i o tatou olaga i aso uma?

1. Skit Pu'upu'u (Drama)

Tagata: Iesu, Ioane, Leo o le Lagi

Fa'atonuga: Fai se faata'ita'iga pu'upu'u o le tala – taulai i le lotomaulalo o Iesu ma le usiusita'i ina ia papatiso o Ia.

PESE: I'm inright, outright, (I totonu, fafo....)
 I'm inright, outright, upright, downright happy all the time.
 I'm inright, outright, upright, downright happy all the time.
 Since Jesus Christ came in,
 And cleansed my heart from sin.
 I'm inright, outright, upright, downright happy all the time.

A'OA'OGA:

1. E tāua le ola fa'apaiaina i taimi uma.
2. Aua tatou te fia tausī mamalu, ae ola loto maulalo.
3. Fa'atino lo tatou valaauina i le fa'amaoni.

.....

ASO SA: 10 ME 2026

MATAUPU: O LE ALOFA O LE TINĀ

SINI: Ia malamalama le vasega, o le alofa o le tinā e lē fo'i, tusa lava i ni faigatā ma puapuaga.

TUSI FAITAU: Esoto 2:1-10

FESOASOANI MO FAIAOGA:

O le aso Sa lenei ua fa'apitoa mo Tinā. E manatua ai lo latou sao tāua i o tatou olaga ma totonu o soo se si'osi'omaga. O le mataupu la o lenei aso Sa, o le toe to manatu i le alofa o le tinā o Mose. I le taimi na fanau ai Mose, sa i ai le nuu o Isaraelu i le pologa mamafa i Aikupito mo le siliā i le 400 tausaga (Esoto 1:8–14). Na tula'i mai le tupu fou i Aikupito e le'i iloa Iosefa, ma ua matata'u i le tupu lau olaola o tagata Eperu, ona ua to'atele ma ua malosī. I le manatu o Farao, a tupu se taua, o le a telē se mafai i tagata Eperu, e fa'ato'ilaloina ai Aikupito ma manumalo ai. O le tali a Farao i lea lagona na tupu a'e, o le faia lea o se fa'atonuga sauā. O lea fa'atonuga e tataui ai ona fasiotia pepe tane uma e fanau mai a le au Eperu (Esoto 1:22). O lenei tulafono na avea ma tulaga mata'utia tele mo tinā uma, aua o lona uiga, o le fanauina o se tama tane e mafai lava ona fa'aoo ai lona oti i le aso lava lea.

O Iokapeta, o le tinā o Mose, ma lona toalua o Amaramo, sa tupuga mai i le aiga o Levi, o se aiga e na mulimuli ane avea ma aiga o le ositaulaga. Ina ua fanau mai Mose, sa iloa e lona tinā o se tama e aulelei ma le tulaga ese. Peita'i, o lea ua ta'oto le tulafono a Farao.

E tolu masina sa nanā ai e Iokapeta lana tama. E mafai ona tatou mafau i le fefe, o le popole, ma le lototele sa i totonu o le loto o lenei tinā, i aso uma e ono maua ai e fitafita a Farao le pepe. Ae ina ua le mafai ona ia nanā ona ua tupu le tama, sa ia faia se mea e sili ona mamafa mo le loto o soo se tinā, o le fa'atuatua ma ua tuuina i le Atua lana tama ina ia ola.

Sa ia lalaga se ato mai i la'au o le kome (papyrus), puluti i le pulu emery ma le pulu safeta, ma tu'u ai i totonu le tama, ma fa'atafea i le vaitafe o le Naila i se nofoaga e ono maua ai e se tagata agalelei.

I le fuafuaga atoatoa a le Atua, na sau ai le afafine o Farao e taele i le vaitafe, ma na ia iloa le pepe ma lagona le alofa i ai. E le'i iloa e le afafine o Farao, o le tinā moni o Mose na toe valaau e tausi le pepe se'ia

matua. O lona uiga, e ui o le pepe na tu'uina i le vai, na toe aumai lava e lona tinā i lalo o le puipuiga a le Atua.

Ina ua matua Mose, na ave i le fale o le afafine o Farao, ma faaigoia ia Mose, o lona uiga “na toina a'e mai le vai.” O lenei pepe, na fa'asaoia i le alofa ma le lototele o lona tinā, na i'u ina avea ma ta'ita'i toa, na ola ai Isaraelu mai le pologa i Aikupito.

O Iokepeta la tamaiti, o se tinā sa lē mafai e lona fefe ma lona pala'ai ona taofia lona alofa. O le ata va'aia lea e le gata o le alofa o se tinā, ae o le alofa sili o le Atua e le mafai ona galo ai lana fanau, e tusa lava po o le ā le tulaga faigata e fa'afeagai. Ae ese lo tatou leaga ma lo tatou lē usita'i i nai o tatou tinā. O le a sou lagona??

GALUEGA FAATINO: TUSITUSIGA:

Ia tufa ni pepa i le vasega ina ia tusi ai se solo, o se sa'afiafiga, o se tala poo le a lava e na te saunia, e uiga i lona tinā

PESE: Lo'u tinā oute alofa ia te oe.

A'OA'OGA:

1. E lē faigofie le alofa o le tinā i mata o fanau.
2. Aua tatou te manatu fa'atauva'a i o tatou tinā.
3. Ou te alofa ma le fa'amaoni i lo'u tinaa

.....

`ASO SA: 24 ME 2026

MATAUPU: O LE POLOA'IGA SILI

SINI: Ia malamalama le vasega, e tataui ona fiafia e fa'alogi ma tausisi i poloaiga mai le Alii.

TUSI FAITAU: Mataio 28:16-20

FESOASOANI MO FAIAOGA:

O le mataupu o lenei aso Sa, o loo fa'amamafaina ai le poloa'iga a Iesu i ona soo. O le poloaiga tamaiti, o se fa'atonuga po'o se feau ua tu'uina mai, ia pe ua poloa'iina ai foi tatou e ao ona tatou fa'atinoina. E tele ma anoanoa'i feau ese'ese i totonu o tatou aiga atoa ai ma fa'atonuga a o tatou matua, fa'atasi ai ma o tatou faiaoga e fa'atonuina ai pea i tatou i le tele o aso, ae peita'i, o le poloaiga lea e pei ona sa tatou faitau i ai, o se poloaiga taua tele lea auā o le poloaiga mai lo tatou Alii o Iesu a'o le'i afio o Ia i le lagi.

O le poloaiga a Iesu i ona so'o, ina ia latou o atu e fai nu'u uma lava ma so'o. Ia papatiso atu i latou i le suafa o le Tama, le Atalii, ma le Agaga Paia. Ia a'oa'o atu ia te'i latou, ia tausi i mea uma e pei ona ia a'oa'o atu ai ia te'i latou. Fa'auta foi, e i ai pea o Ia fa'atasi ma i latou sei'a o'o i le gata'aga o le lalolagi. O le tasi lea poloaiga sili ma le taua a lo tatou Alii ua ia fetalai ai i ona so'o ina ia o latou o e fa'ataunu'u.

Ae o le mea ua mautinoa tamaiti, o tatou foi o isi so'o, auā o lea ua tatou filifilia Iesu e fai ma Alii ma Fa'aola i o tatou olaga. E ui la ina le mafai ona tatou papatisoina tagata, ae e i ai a le taimi e avea ai nisi o'i tatou ma Faifeau, pe a o'o ina matutua i tatou, ona mafai lea ona tatou faia lea vavega. Peita'i, o le tatou faia ma le usitai'a o le finagalo o le Atua, e iai i lo tatou fa'alogu, ususitai'i, loto alofa, loto fesoasoani, loto fa'amagalo, ma fa'atupu le filemu, o le fa'ailoga lava lea o lo tatou usitai'a o ana poloaiga.

Manatua ua fetalai Iesu e i ai pea o Ia ma i tatou i taimi uma sei'a o'o i le gata'aga o le lalolagi. O Ia na te tausia ma laveaiina i tatou ma fa'amanuia i tatou i so'o se mea tatou te fia maua ai se fesoasoani, e ala i lo tatou ola su'esu'e, sailiili, galulue, ma tatalo pea i le Atua i so'o se mea tatou te mana'omia i aso uma e le aunoa.

GALUEGA FAATINO: Fesili mo Talanoaga

- I. O le ā le poloaiga na tuu atu e Iesu i soo?*
- II. O ai e tatau ona avea ma soo o Iesu?*
- III. O ā auala e mafai ona e fesoasoani i lenei galuega e tusa ai ma lou matua?*
- IV. O le ā le uiga o le faapea mai Iesu: “oute i ai pea faatasi ma outou”?*

Fa'atinoga mo Tamaiti: Ata Valivali

Autu: “Faia ma Soo”

Tusi ni ata o ni tagata eseese, o loo faia le papatisoga, o loo faia le aoaoina atu, ma o lo'o tatalo faatasi.

PESE: Ua ou filifili e mulimuli ia Iesu

A'OA'OGA:

1. Ia usita'i i poloaiga a le Alii e manuia ai.
2. Ia fai i tatou ma fa'ata'ita'iga i nisi i ala o le Alii.
3. Taulamua i le fai meatonu ma le amio lelei.

.....

ASO SA: 31 ME 2026

MATAUPU: O LE AFIO MAI O LE AGAGA PAIA
(Penetekoso)

SINI: Ia malamalama tamaiti i le taua o le Afio mai o le Agaga Paia ma lona aafiaga i le olaga o le Ekalesia ma le tagata talitonu.

TUSI FAITAU: Galuega 2:1-13

FESOASOANI MO FAIAOGA:

O le aso Penetekoso, o se tasi o aso tāua i le kalena o le au Kerisiano i le lalolagi atoa. O le aso e atoa i ai le 50 aso talu ona faamanatu e tagata Iutaia le aso o le Paseka. O le aso faamanatu o le Paseka, o le aso e toe faamanatu mai ai i tagata Iutaia le alofa laveai o le Atua ma le faasa'olotoina o tagata Iutaia mai le nofo pologa i Aikupito. O le aso e toe to manatu ai tagata Iutaia i le faaolataga a le Atua, na aveese mai ai i latou mai le pologa i Aikupito ina ua sopoloa le to'asa o le Atua mai tagata Iutaia, a ua aoa'i ma afaina ai tagata Aikupito.

O le aso e atoa i ai le fitu vaiaso talu ona maea le Paseka. Fai mai o le aso lea e momoli ai le viiga ma le faafetai a le nuu i le Atua ma ofoina i le Atua ulua'i fua o faatoaga. O le aso o le omai faatasi o le nuu e momoli i le Atua le viiga ma le faaneetaga, ona o lona alofa ma lona agalelei, i le taimi o le tala faasolopito, (Feagaiga Tuai).

Peita'i i le taimi o le Feagaiga Fou, ina ua maliu Iesu ma toe tu manumalo mai le oti ma le tuugamau, ona faitau lea o le 40 o aso talu ona toetu mai. O le tāua o lea aso i le kalena o le au Kerisiano, ona o le aso lea na afio a'e ai le Alii i le lagi i lona Tamā. (Ascension). Lea ua faaagaina o le aso o le "Afio a'e".

Ona faatali ai lea mo le 10 o aso, e afio ifo ai le Agaga Paia, e pei ona i ai le aso Penetekoso. O le aso e atoa iai le 50 o aso, talu ona toetu le Alii o Iesu ma afio a'e i le lagi, ae afio ifo le Agaga Paia, e faaauau le galuega o le faasalalauina atu o le talalelei, e ala i lona mana e fesoasoani i le au soo ma le au Aposetolo.

O le aso o le talisuaga faa-Iutaia, ma o le afuaga lea na mafuta faatasi ai soo o Iesu ma le motu o tagata i le mea e tasi, lea na afio ifo ai le Agaga Paia i luga o i latou e pei ona faamatalaina e Luka. Fai mai ua agi tele le matagi ma ua faatumulia ai le fale uma, ma ua afio ifo le Agaga Paia faapei o se afi i luga o i latou uma, ona latou tautatala ai lea i gagana eseese. E gagana le au Kerisiano, o le aso lea ua fai ma aso fanau o le ulua'i Ekalesia Kerisiano, ina ua liua e le Agaga Paia loto o tagata, e fai ma Kerisiano. O tagata ua talitonu ma talia le talalelei ia Iesu Keriso, e ala i le faaolataga, e pei ona maliu ma toe tu manumalo

mai ai. O loo faamanatuina e tagata Kerisiano o le Penetekoso i tausaga uma, e manatua ai le Afio mai o le Agaga Paia o le Alii i le lalolagi, e fai ma fesoasoani i lana tagata.

GALUEGA FAATINO: PASO (Word Search Puzzle)

Saili uma upu nei:

agaga paia, soo, afi, gagana, Penetekoso, Iutaia, Ieruselema, leo, malosi

s	x	j	o	I	t	v	m	l	e
f	l	a	r	u	g	q	o	r	i
P	e	n	e	t	e	k	o	s	o
d	o	a	c	a	j	a	s	t	e
s	h	g	x	i	b	v	f	c	w
g	i	a	m	a	l	o	s	i	f
b	a	g	a	g	a	p	a	i	a
a	m	e	l	a	s	u	r	e	I

PESE:

Agaga Sa e afio mai (114 Pese ma Viiga)

A'OA'OGA:

1. O le Ekalesia, e mo tagata uma e vivii ma tapua'i i le Atua.
2. Ia manatua le alofa o Keriso e ala i lana Ekalesia.
3. O le aso Penetekoso, o le fa'aaliga o le alofa mai o Keriso e ala i lona Agaga Paia.

.....

MANATU TA'IALA IUNI:

“VA'AIGA I LE SOIFUAGA O IESU”

O le soifuga o Iesu a'o i ai i le lalolagi nei, o loo aumaia ai ni a'oa'oga t̄aua ma ni fa'ata'ita'iga lelei mo le soifua ma le olaga o le tagata. O mataupu o lenei masina, o se toe vaai i le soifuaga o Iesu, ina ia tatou fa'ata'ita'i i ai ma ia tatou usiusita'i i ai.

ASO SA: 7 IUNI 2026

MATAUPU: O NIKOTEMO MA IESU

SINI: Ia malamalama le vasega o le ola saili i le Atua i so'o se mea ua le mafai ona tatou iloa, faapena foi ona fesoasoani le Agaga o le Alii e faamalamalama atili mo i tatou.

TUSI FAITAU: Ioane 3: 1 -17

FESOASOANI MO FAIAOGA:

O Nikotemo o se tasi o le 'au Saneterini (Sanhedrin). O Saneterini o ta'ita'i nei o le lotu. O i latou o tagata e tele lo latou tamāoaiga, lea la e i ai ma Nikotemo. O ia foi o le Faresaio po'o le a'oa'o o le tulafono i totonu o le lotu.

O lea ua alu Nikotemo le Faresaio ia Iesu e fesili i ai e uiga i le mālō o le Atua. E ui lava i le atamai o lea Faresaio i le Tusi Paia, peita'i e le o malamalama tele o ia i a'oa'oga a le Alii Faaola.

Auā afai o ia o le a'oa'o o le lotu Iutaia, e le tataua la ona fesili fua ia Iesu auā ua ia iloa le Tusi Paia atoa. Peitai, ua manino mai i le mea ua faia e Nikotemo, e matuā itiiti lava lona iloina o le finagalo moni o le Alii o Iesu. E matuā eseese lava le iloa faa-le-tagata, ma le silafia faa-le-Atua o loo ia Iesu.

Fai mai na ia alu ane Nikotemo ia Iesu i le po ona o lona naunau tele i le fia iloa ma le fia malamalama. O le manatu o Nikotemo, o se taimi lelei lea na te mauaina ai le Alii Faaola, auā o le aso atoa o le taimi lea o lo'o fai faamalologa ma vavega a le Alii o Iesu. Aemaise ai, o le vaitaimi o le malosia o le tete'e atu o ta'ita'i o le lotu Iutaia i a'oa'oga a Iesu ma lo latou le taliaina o le afio mai o Iesu ma ana a'oa'oga.

O le pogai lea o le alu ifo o Nikotemo ia Iesu, ua ia mana'omia tele se fesoasoani mo le faapupulaina atili o ana a'oa'oga. O a'oa'oga ina ia malamalama atili ai le tagata pogisā i le finagalo manino o le Atua.

Tatou le fanau, ia o tatou fesili i le Atua i taimi uma i mea ua tatou pogisa ai ma mea ua le mafai ona tatou malamalama ai. Ia tatou talitonu ma le mautinoa, o Iesu o lo tatou uo moni na Ia ofoina mai lona ola e fai ma faaolataga mo le lalolagi atoa. O le ata manino lenā o le Atua e alofa ia i tatou uma.

Uiga o Upu

- | | | |
|------|-----------|---|
| i) | Faresaio | o a'oa'o le tulafono i totonu o le lotu Iutaia, e i ai lo latou talitonuga e i ai le ola i tua atu o le oti |
| ii) | Faipule | e pei o i latou nei o sui o le lotu, i totonu o le fa'alapotopotoga o ta'ita'i o le lotu Iutaia e to'a 70. (Member of the Jewish ruling council) |
| iii) | Rapi | ua faaliliuina mai le upu Eleni o le Rabbi o lona uiga o le faiaoga i le lotu Iutaia. O se igoa e ave i tagata maua luga pei o le master, o le igoa foi na faaigoia ai le Alii o Iesu. Po'o le faiaoga i le lotu Iutaia |
| iv) | Faatuatua | talitonu ma faamoemoe ma faalagolago i mea e le o vaaia e o tatou mata |
| v) | Faamasino | o le faia lea o se faaiuga amiotonu i se va o ni tagata se to'alua, pe a o'o ina i ai se mataupu taua e talanoaina. |

GALUEGA FAATINO: TALI I LE SA'O POO LE SESE

1. O Nikotemo o se tasi o so'o o Iesu.
2. Na alu Nikotemo ia Iesu i le aoauli
3. E moni oute fai atu ia te oe, a le toe fanau le tagata, e le mafai ona iloa e ia le malo o le Atua....o upu ia a Iesu.
4. O le toe fanaufouina o le salamo faamaoni i manatu o Iesu

PESE: Ua ou filifili....

A'OA'OGA:

1. Ia lagona le loto maulalo i le Atua.
2. Fesili i le Atua i mea tatou te fia iloa.
3. E itiiti lo tatou iloa o le Atua pe a o tatou fa'amauualuluga.

.....

ASO SA: 14 IUNI 2026

MATAUPU: NA FAFAGA E IESU LE 5,000

SINI: Ia malamalama le vasega e saunia e Iesu manaomiaga (needs) o tagata uma.

TUSI FAITAU: Ioane 6:1-14

FESOASOANI MO FAIAOGA:

O Iesu ma ona soo sa i luga o le mauga. Sa Ia a'oa'o atu ma fa'a'ailoa atu le Talalelei e uiga i le Atua ma lona finagalo. Sa faapotopoto le motu o tagata e tusa ma le lima afe tane, e le aofia ai fafine ma fanau, i le vaega

tonu o loo a'oa'o ai Iesu ma ona soo. O tagata na latou mulimuli ia Iesu ona sa latou fia faalogologo i ana aoaoga ma vaai i vavega na Ia faia.

Ua manaia le fa'asologa o le a'oa'o atu a Iesu, ma ua fiafia foi le faalogo a le motu o tagata. Ua alu le aso ma ua oo i le afiafi, ma ua mana'omia e tagata se meaai. Peita'i, sa leai se mea'ai mo le motu o tagata. E le'i saunia foi e soo ni meaai mo tagata, e pei o le masani i o tatou taimi pe a fai ni potopotoga ma ni feiloa'iga o tagata. Na fesili Iesu ia Filipino o le tasi o ona soo, mo ni meaai mo tagata. "O fea tatou te maua ai meaai mo nei tagata?" Na tali Filipino, "E le lava tupe e lava ai e faatau ai se fasi mo tagata uma."

Ae na ta'u atu e le tasi soo o Aneterea, o loo i ai le tama itiiti o lo'o i ai ana falaoa se lima ma i'a e lua. E ui ina laititi, ae na fetalai Iesu ia aumai. Na faia e Iesu le tatalo o le faafetai, ma vaevaeina, ma ua tufatufa atu i tagata uma. O le mea e ofo ai, fai mai e le gata na ma'o'ona tagata uma, ae na totoe foi areto ma i'a ma e 12 ato na ttuumu ai.

O le vavega lenei e faaalua ai e mafai e Iesu ona saunia soo se mea e manaomia e tagata uma, tusa lava pe laititi mea o loo i ai. E le gata i le saunia o meaai mo le tino, ae o Iesu e saunia foi mea uma e manaomia mo o tatou loto ma agaga. O le fafagaina la e Iesu o tagata e 5,000 o tane poo tamalolola, fa'atasi ai ma fafine ma tamaiti e le'i faitauina, na fafaga i a'oa'oga mo le malosi faa-le-agaga, faatasi ai ma areto (falaoa) ma i'a, o meaai mo le malosi i le tino. O le silisiliese lea o lo tatou Alii o Iesu, e fesoasoani mo lo tatou ola i le tino, ae sili ai lo tatou ola i le faa-le-agaga.

GALUEGA FAATINO:

1. Fesili mo Fesootaiga:

- I. O ai sa i luga o le mauga faatasi ma Iesu?
- II. O le ā le faafitauli sa feagai ma le motu o tagata?
- III. O le ā le mea na aumai e le tama itiiti?
- IV. O le ā le vavega na faia e Iesu?
- V. E faapefea ona fesoasoani Iesu ia i tatou i aso uma?

2. Galuega Fa'a'oga (Activity):

Ata: tusi mai se ata e fa'aali ai Iesu o lo'o tufatufa atu le falaoa ma i'a i tagata, tagata o loo aai, ma le au soo o loo tufatufa meaai.

3. Galuega i Aiga

Lisi mai ni galuega lelei e mafai one e faia le aiga e fesoasoani ai i se tasi (e pei o le fesoasoani i galuega i le fale ia tamā ma tinā).

PESE: Five Loaves and Two Fishes (Tune: Ten Little Indians)

One little boy shared his lunch
One little boy shared his lunch
One little boy shared his lunch
And Jesus fed five thousand

Five little loaves and two little fishes
Five little loaves and two little fishes
Five little loaves and two little fishes
Jesus fed five thousand.

Took the food, prayed, and broke it
Took the food, prayed, and broke it
Took the food, prayed, and broke it
Then passed it to the apostles.

Each one ate until he was full
Each one ate until he was full
Each one ate until he was full
And there were still leftovers.

Twelve basketfuls were left over
Twelve basketfuls were left over
Twelve basketfuls were left over
After each had eaten.

A'OA'OGA:

1. E mafaia e Iesu ona tali mana'oga o tagata uma.
2. Talitonu ia Iesu e manuia ai.
3. Ia fiafia e fa'alogo i a'oa'oga faa-Iesu e ola ai le agaga.

.....

ASO SA: 21 IUNI 2026

MATAUPU: NA SAVALI IESU I LUGA O LE VAI

SINI: Ia malamalama le vasega, o Iesu o Ia lava o le Atua i lona mana ma lona silisiliese.

TUSI FAITAU: Mataio 14:22-33

FESOASOANI MO FAIAOGA:

Ina ua uma ona fafaga e Iesu le lima afe o tagata (Mataio 14:13-21), na Ia faatonuina ai ona soo ina ia o atu i le vaa ma sopoia le vaituloto, ae a o le taimi lea, na alu Iesu i luga o le mauga e tatalo ai. A'o i ai le vaa o le au soo i le ogatotonu o le vaituloto, na afatia ai e matagi ma galu malolosi.

Ae o le taimi lea o le vaeluaga o le po (pe tusa o le itula e fa i le taeao), na savali atu ai Iesu i luga o le vai agai i le vaa. Na matata'u ona soo, ma manatu o se agaga lea e savali atu, ona e leai lava se tagata ola e

mafai ona savali i luga o se vai, e aunoa ma se magoto. Sa fa'ate'ia i latou i le oo atu, o Iesu o loo savali atu, ma faamafanafana ia i latou i le tala, "o a'u lenei, aua tou te fefefe."

Na tali Peteru masalosalo, "Le Alii e, afai o oe lenei, ia e poloa'i mai a'u ou te savali atu i luga o le vai i ou luma." Na fetalai Iesu ia Peteru ina ia savali atu. Na alu ese Peteru mai i le vaa ma savali i luga o le vai agai ia Iesu. Ae ina ua silasila i le matagi malosi, na mata'u ai o ia ma amata ai ona goto i lalo, ona alaga atu lea i le Alii ina ia fa'aola ia te ia. Na vave aapa atu Iesu ma uu o ia, ma fetalai atu, "E laitiiti lou faatuatua, aisea ua e masalosalo ai?"

Ina ua ulu atu Iesu ma Peteru i le vaa, ma ua malū le matagi. Ona ifo lea o le au soo ia Iesu, ma fai atu, "E moni lava, o oe o le Alo o le Atua."

GALUEGA FAATINO:

Fesili mo le Vasega e fa'alautele ai le mataupu.

1. Aisea na matata 'u ai soo ina ua latou vaaia Iesu o savali i luga o le vai?
2. O le ā le aoga o le faatuatua i le tala i le savali o Iesu i luga o le vai?
3. O le ā na tupu ia Peteru ina ua amata ona masalosalo?
4. E faapefea ona fesoasoani Iesu ia i tatou i taimi o tatou fefe ai?

Galuega a le Vasega:

1. Faamalositino: Faia se taaloga o le 'balance' i luga o le paipa/laau laitiiti. Ia ta'ito'atasi le vasega e savali i luga o le paipa poo ai e lē pa'ū.

Saili mai upu o le Paso:

MAUGA, PETERU, SAVALI, MATAGI, MASALOSALO, FAATUATUA, IESU, MATATAU, ALOFA, GOTO, FAAOLA, TATALO.

K	A	U	M	A	U	G	A	H	W	M
H	L	Z	S	A	V	A	L	I	T	A
A	O	P	O	E	O	L	A	T	A	T
G	A	R	O	Q	I	A	V	Z	B	A
O	A	P	J	U	R	E	T	E	P	T
T	F	A	A	T	U	A	T	U	A	A
O	L	A	S	O	L	A	S	A	M	U

PESE:

Oh, be careful little eyes, what you see

Oh, be careful little eyes, what you see.
 Oh, be careful little eyes, what you see.
 There's a Father up above, looking down in tender love,
 So be careful little eyes, what you see.
 Be careful little ears what you hear
 Be careful little mouth what you say...
 Be careful little hands, what you touch...
 Be careful little feet, where you go...

A'OA'OGA:

1. E pule aoao Iesu i mea uma o le foafoaga.
2. Aua le masalosalo i le mana o Iesu.
3. Tatou te mafaia mea uma i le fa'atuatua.

.....

ASO SA: 28 IUNI 2026

MATAUPU: O LE SAMARIA AGALELEI

SINI: Ia malamalama le vasega, o le agalelei e lē moomia ai o tatou tulaga ma tofiga, ua na o le alofa ia moni.

TUSI FAITAU: Luka 10:25-37

FESOASOANI MO FAIAOGA:

Na tulai se tasi o a’oa’o (tagata atamai i le tulafono) e tofotofo ia Iesu, ma fesili atu, “Le a’oa’o e, se ā se mea oute faia ina ia ou maua ai le ola e faavavau?” Na tali Iesu, “O le ā ea ua tusia i le tulafono?” Na ia tali le a’oa’o tulafono, “Ua tali mai o ia, ua faapea mai, E te alofa atu i le Alii lou Atua ma lou loto atoa, ma lou agaga atoa, ma lou malosi atoa, ma lou manatu atoa; e te alofa atu foi i lē lua te tuaoi, ia pei o oe lava ia te oe”. Na fetalai Iesu, “Ua sa’o lau tali. Ia e faapea ona fai, e te ola ai”.

Peitai, na mana’o le a’oa’o tulafono e toe tofotofo Iesu, ona ia toe fesili atu lea, “O ai foi le tagata ma te tuaoi?”

O le tali atu a Iesu na Ia faamatalaina ai le tala i le tagata Iutaia na malaga atu mai i Ierusalemaga’i atu i Ieriko, ae na osofa’ia e nisi o le au gaoi, sasa, ma tu’ua i le tulaga matuiā. Na pasi atu le ositaulaga, ae na liliu ese, leai se fesoasoani. Na pasi atu le tagata Sa-Levī, ae na faapea foi ona liliu ese. Ae na alu ane se tasi tagata Samaria, ma tago atu ma le alofa i le tagata na afaina. Na fusifusia ona manu’a, liligi i ai le suāu’u ma le uaina. Na amoina o ia i lana asini ma ave i le fale talimalo. Na totogi le tau o le fale talimalo, ma folafola e toe totogi atili i le toe foi mai.

Na ese lagona o le a’oa’o tulafono ina ua fesili atu Iesu, “O ai la o i latou e to’atolu na avea ma tuaoi i le tagata na mafatia i lima o le ‘au gaoi’?”. Na tali le a’oa’o tulafono fiapoto, “O lē na alofa mutimutivale

atu ia te ia.”. O ia lena o le Samaria. Na fetalai Iesu, “Ia e alu, ma ia e faapea ona fai.”

Se’i o tatou vaai toto’a i le eseese o le to’atolu o loo ta’ua i le tala. (Ositaulaga, Sa-Levī, ma le Samaria).

FA’AMATALAGA O LE ESESEGA

Tagata	Talitonuga	Gaioiga i le tala	Manatu tāua
Ositaulaga	Ta’ita’i o le malumalu. E osia taulaga i le Alii	Na savali ese e le’i fesoasoani.	Fa’ata’ita’iga o le tausi o le tulafono ae leai se alofa.
Sa-Levī	Tagata e fesoasoani i le malumalu.	Na savale ese, e leai se fesoasoani na faia.	Fa’ata’ita’iga o le tagata e iloa tulafono ae lē fia fesoasoani.
Samaria	Tagata e lē taliaina e tagata Iutaia ona o tagata ese. Sa manatu Iutaia o le Samaria o tagata lē lelei, lē mamā, ma lē amana’ia e le Atua.	Na fesoasoani, alofa, faatino le alofa i le mea e gata ai.	Fa’ata’ita’iga moni o le tagata e na te faatuāoi i le tagata mafatia ma fia maua le fesoasoani.

GALUEGA FAATINO: Fesili mo le Vasega

1. O le ā le fesili a le a’oa’o tulafono na amata ai le tala?
2. O ai tagata e to’atolu na pasi ane i le tagata na afaina?
3. O le ā le eseese o le Samaria i le ositaulaga ma le Sa-Levī?

4. E faapefea ona tatou avea ma "Samaria agalelei" i o tatou aso nei?

PESE: Alofa i ou tuaoi.

A'OA'OGA:

1. Ia fa'atino le agalelei i soo se tagata.
2. O le finagalo o Iesu, ia faia mea uma i le alofa.
3. Aua le fia mamalu i le tulaga tofi, ae ia sili le alofa.

.....

MANATU TA'IALA IULAI:

“OLA I LE LOTO MAUALALO”

O le loto o le tagata e mafua ai ona ia faia o soo se faatinoga ma se faaiuga. E lua ituaiga loto. O le loto faa-maualuga ma le loto maualalo. E leaga le loto faamaualuga, aua le maua ai tatou. O le loto maualalo e lelei, e mafai ai ona fai o soo se mea lelei, ma iu ai i le fiafia o tagata uma, ae sili ona maua ai le viiga o le Atua

ASO SA: 05 IULAI 2026

MATAUPU: O LE ATALII OLA FA'AMAUMAU

SINI: Ia malamalama le vasega, ia faaaoga tatau mea uma ua foai mai e le Atua mo i tatou, ae aua le faama'uma'uina i mea lē aogā.

TUSI FAITAU: Luka 15: 11-32

FESOASOANI MO FAIAOGA:

O se tasi nei o tala faa-faataoto ua masani ona faalogo i ai tatou. O le tala i le uii faamaumau oa. Ae ua sui foi le faaupuna o le ulutala o le tatou Mataupu- O le atalii ola faama'uma'u. O lona uiga, o le atalii ua ia soona faa-aoga le tatau le oa a lona tama, e fai ai lona ola soona fai, ma faatino ai lona mana'o, ae na iu i le leai o se mea lelei, ma se mea aoga na maua mai ai.

Ua ia faama'imau tupe a lona tamā ma le latou aiga, e ala i le soona faaaoga ma le leai ose fuafua lelei. E faapea lava le olaga o le tagata, e tele loa mea e maua, ua tele foi le faaaoga le tatau, ma le leai o se fuafua lelei. Afai e uma lea manuia sa i ai, ona faatoa toe lagona lea e le tagata o lona sese.

O le faataoto lenei a Iesu, e autu i se tamā ma sana fanau tama toalua, ua mana'o le atalii laititi i lana vaega o le oa, sei alu ai e tafao. Ua ave i ai e le tamā, ua alu ma tafao, ae peitai, na uma loa le oa sa ia te ia, ona mativa ai lea o ia. Ma iu ai loa, ua aai faatasi ma puua, a le toeaina na faigaluega ai. O i na ia toe lagona ai, e sili lava le aiga moni

O le faamanatu mai foi lea o le tala i le atalii ola faama'uma'u i lenei taeao. E tele tupe ma mea lelei na maua e lenei tama, ae ua ia alu ma tafao ma ana uo. Sa tele ana uo, auā sa tele ana tupe, ae ina ua leai se tupe, ua leai ma se uo o toe latalata mai. Ua moni ai le upu, uo a mo aso uma, ae o uso mo aso vale.

Lea na onosai lava lona uso matua, ma faatali mai ile aiga. Ae na sili ai ona toe fiafia le tamā, ina ua toe foi mai lona atalii sa leiloa, a'o lenei ua toe maua, sa oti foi ae ua toe ola.

E faapea foi ia te i tatou, ua tatou soona faaaoga le tatau tupe a matua, ao lea ua a'oa'o mai le tala o lenei taeao, e leai se aoga o le ola faama'uma'u. Ae o a lava mea ua foai mai e le Atua mo i tatou i lea aso ma lea aso, ia tatou talia ma le faafetai, ma ia faaaoga ma le tatau.

Ae afai foi ua tatou faia se mea sese, ia tatou lagona le loto maualalo, faatoese i le Atua, aemaise o le faatoese i matua ma tagata matutua o le aiga. E toe maua ai le fiafia, aemaise o le nofo lelei i totonu o aiga.

Upu ma Uiga

- i) oa - tupe e tele
- ii) sena e - atalii

GALUEGA FAATINO: Faaaliga Manatu

Ia fesili i tamaiti taitoatasi, poo le a sona iloa, pe lelei pe leaga le mea na faia e le atalii laititi? Ae a le atalii matua? Ae a le tamā o le aiga? A'o le a foi sau a'oa'oga taua ua maua mai ai?

PESE: E mana'o Iesu i le fealofani

A'OA'OGA:

1. Aua e te faimaimau mea aogā a matua
2. Talia ma le fiafia soo se mea ua maua
3. Faatoese pe afai ua sese

.....

ASO SA: 12 IULAI 2026

MATAUPU: UA FAAMALOLOINA E IESU LE TAGATA TAUASO

SINI: Ia malamalama le vasega, o Iesu lava o le foma'i sili

TUSI FAITAU: Ioane 9:1-12

FESOASOANI MO FAIAOGA:

O se tasi lenei o vavega ofoofogia na faia e Iesu, na ia faapupula ai mata o le tagata na fanau mai o tauaso, e le mafai ona vaai. O loo nofonofo i le auala i le malumalu i Ierusalem ma aisi i tagata. Lea ua taunuu atu i ai le savaliga a Iesu ma ona soo

Ua fesili ai ona soo ia Iesu, poo 28en a agasala, poo mātua, poo le tauaso? Ua mafua ai ona tauaso le tama. Ae tali Iesu, e leai se isi o agasala, ae peita'i, ina ia faaaliga ai galuega mamana a le Atua ia te ia. Ua fetalai Iesu, "O a'u nei o le malamalama o le lalolagi, e tatau lava ona ou faia galuega a le Atua, manu o ao", o nisi ia o upu na fetalai ai Iesu i lona au soo

Na feanu Iesu i le palapala ma palu faatasi, ona nini ai lea o mata o le tauaso, ma le faatonuga, ia alu e e mulumulu i le vai o Selo, ina ia pupula ai ona mata. Na alu le tauaso, ua fufulu ona mata i le vai o Selo, ma ua pupula ai ona mata ma ua faamaloloina e Iesu.

Ua tuufesili le toatele o tagata i le tauaso ua pupula, poo ai sa ia faamalolo ia te ia. Ae tali le tauaso ua pupula, o le tasi tagata e igoa ia Iesu, ae leiloa poo fea ua alu atu i ai. Na iloa e le au faresaio ma tusiupu lenei mea ua faia i le Aso Sapati, ona latou suesue ai lea, poo ai lenei tagata ua ia faamalolo i le tauaso.

I le faaiuga o le tala, na iloa ai le faamaualuga o loto o faresaio ma tusiupu o le tulafono, ina ua leai so latou e talitonu ia Iesu, aemaise o le aso Sapati ua faia ai lea faamalolologa. Ae ua atili ai ona talitonu le tauaso ua pupula ia Iesu ma ana aoaoga

O le tauaso o loo i le tatou tala, na fanau mai lava o tauaso, o i e faamaonia ai, le pule aoao a le Atua i tagata uma, i le tino ma le agaga. Lea lava na toe faapupula e Iesu mata faaletino ae ua sili ai ona pupula ona mata faaleagaga ina ua talitonu ia Iesu

Ia tatou talitonu ma le faatuatua, e faia e le Atua mea sili ona lelei mo le tagata. Ia tatou faamoemoe i le Atua i soo se mea e fia fai. Tatalo ma ta'u i le Atua, mea uma o loo e mana'o i ai.

Upu ma Uiga:

- i) Rapi e - a'oa'o
- ii) mulumulu - fufulu ile vai
- iii) Selo a - o le auina

GALUEGA FAATINO: FAATALANOAGA

Faatalanoa le vasega taitoatasi i so latou manatu, i le mafaia e Iesu ona toe faapupula le tagata na fanau mai o tauaso. Pe na faatuatua le tauaso ia Iesu? Poo le alofa o Iesu na Ia faamalolo ai?

PESE- A iai Iesu i se aiga

A'OA'OGA

1. O Iesu o le foma'i sili o le tino ma le agaga
2. E mafaia e le Atua mea uma
3. Alofa i tagata mama'i

.....

ASO SA: 19 IULAI 2026

MATAUPU: UA LIUA IESU

SINI: Ia malamalama le vasega, o le liua o Iesu e faaalua ai lona itu Atua, ina ia faamalosi ai le faatuatua o lona au soo, ma ua taunuu ai perofetaga mai le Feagaiga Tuai

TUSI FAITAU: Mataio 17:1-13

FESOASOANI MO FAIAOGA

O loo molimau Mataio ua mavae aso e ono, ua o ai Iesu, Peteru, Iakopo ma Ioane i luga o le mauga maua luga. Ona liua ai lea o ona fofoga ua pupula mai pei o le la, ma ona ofu ua sinasina pei o le malamalama. Ae ua i ai ma Mose ma Elia, o loo vaai tino atu i ai le au soo to'atolu na latou o. Ae sau ai nma le leo, "O lo'u Atalii pele lena, ou te fiafia ia te Ia, ia outou faalogo ia te Ia"

O se vaaiga ofoofogia na iloa e Peteru, Iakopo ma Ioane. A'o le faaalua foi lea o le itu Atua o Iesu ina ia mauaa le talitonu faatuatua o le au soo na vaai tino i lea faaaliga i luga o le mauga. Na iloa ai foi Mose ma Elia, o le faailoga o tulafono ma perofeta na muamua, a'o lenei ua sau Iesu e sili atu i perofeta ma le faataunu'uina o tulafono.

O se tasi lenei o tala o loo faamau foi e Mareko 9:2-8 ma Luka 9:28-36, ina ua uma ona faailoa e Iesu i lona au soo, o le a ia maliu ai. Lea ua vaai tino ma molimau manino Peteru, Iakopo ma Ioane, e moni lava o Iesu o le Alo o le Atua, ua ia faia vavega ma faailoga, e le mafaia e se tagata ona ia faia.

O lea lava e faamaonia e Peteru i lana molimau i le 2 Peteru 1:16-18, ma aumai ai se fautuaga mo tagata uma, ua pei o se lamepa e mumui le mea pogisa. O le mea ua manino o Iesu o le Nasareta, o ia foi o le Alo o le Atua, o le Atua ua liutino tagata, ma afio mai ile lalolagi, sei faatunuu le faaolataga mo le lalolagi

Lea lava na afio mai e pei ona faamauiina e le au fai Evagelia, tatou te faitau ai i ia tala, ona tatou malamalama ai lea, ma fai ma faamalosi 'au ia te i tatou uma. Amuia lava lenei ausoo toatolu na latou vaai tino ile liua o fofoga o Iesu, e ui ile fai ma fefe o Simona Peteru, ae o ia lava na fetalai ai Iesu, o le a fai ma faifaiva i tagata

O le leo na mulimuli mai tua o le liua o Iesu, "O lo'u Atalii pele lena, ou te fiafia ia te ia, ia outou faalogo ia te Ia". Ua faasino tonu i le au soo sa i ai, ae mafai foi ona faasino i tagata uma, e aofia ai oe ma a'u. O lona uiga, o le tatou faalogo ma usita'i i soo se tagata matua, o le faalogo ma usita'i lava lena ia Iesu ma lona finagalo.

E le taumate le manuia o le olaga o le tagata e faalogo ma usitai, ia ae le taumate foi le iuga o le tagata e le faalogo lelei, e fai lava le mea o loo mana’o i ai, mulimuli ane, ua leai se aoga. Tatou maua pea le fiafia e faalogo ma usita’i, e iu manuia ai o tatou olaga i le lumana’i.

Upu ma Uiga

i) liua - ua suia i se vaaiga fou e le masani ai

GALUEGA FAATINO: Tali ile Sa’o poo le Sese

1. O le aso lona fitu na o ai Iesu ma soo to’atolu i luga o le mauga
2. E to’a-fa tagata na o i luga o le mauga
3. O Iesu o le Atua lava lea
4. Na’o tagata malolosi e alofa i ai Iesu.

PESE- Faalogo ma Usita’i

A’OA’OGA:

1. O Iesu o le uo a tamaiti
2. E lelei le Atua
3. Faalogo ma usitai e sili i mea uma

.....

ASO SA: 26 IULAI 2026

MATAUPU: NA TOE FAAOLA E IESU LASALO

SINI: Ia malamalama le vasega, ua na’o le mana o le Atua, e tupu ai mea ofoofogia i le ola o le tagata

TUSI FAITAU: Ioane 11: 38-44

FESOASOANI MO FAIAOGA:

O se tasi nei o vavega sili ona ofoofogia na faia e Iesu, ua Ia toe faaola mai Lasalo lana uo, ua fa aso talu ona maliu, o loo taoto i totonu o le tuugamau. O Maria ma Mareta, o tuafafine ia o Lasalo, sa fetagisi ma misia le la tuagane, ua la fai ia Iesu, pe ana iinei ma i latou, e lē oti Lasalo. Ae tali Iesu, “O a’u nei o le toetu ma le ola, o le faatuatua mai ia te a’u, e ui lava ina oti, a e ola lava ia. O tagata ola uma o e faatuatua mai ia te a’u, e le oti lava e oo i le faavavau”

O le fetalaiga lenei a Iesu na fai ma faamalosi ia Maria ma Mareta, ma nisi tagata Iutaia sa latou i ai faatasi, sei tau faafilemu ma tau faato’ato’a ai le faanoanoa ua maua ai i latou. Na tatalo Iesu i lona Tamā, sei alofa mai, ma toe faaola ia Lasalo. Ona alaga ai lea ua leo tele i le oti, “Lasalo e, ina sau ia i fafo”

Ona sau ai lea i fafo o Lasalo, ua toe ola. O loo fusifusia ma aui lona tino i ie ma ona mata o loo fusi i le solosolo. Fetalai Iesu- “Tatala ia ia te ia, ina tuu atu e alu”.

O le tala lea o lenei taeao, ile toe faaolaina e Iesu o Lasalo, ua fa aso talu ona oti, a’o lenei ua toe faaola e Iesu. O le uiga lea na afio mai ai Iesu i lenei lalolagi, ina ia faaola le tagata agasala ua oti le tino ma le agaga.

Sa le i malolo ai foi le galuega a Maria ma Mareta, i lo laua galulue ai ma le faatuatua, ma talitonu ia Iesu, e mafaia e Iesu ona fai mea uma, ae ia o faatasi ma le faatuatua o le tagata pei o Maria ma Mareta.

E toatele tagata Iutaia sa latou molimau i lenei vavega sa faia e Iesu, sa talitonu ai nisi, a’o nisi ua latou tuufesili poo ai lenei tagata ua faapei o le Atua.

Upu ma Uiga

- i) Rapi e - o le a’oa’o
- ii) tausuai - le mautonu /

GALUEGA FAATINO- TALI FESILI

1. Na faapefea ona silafia e Iesu ua maliliu Lasalo?

Tali: Na ta'u iai e Maria ma Mareta

2. O ai igoa o tuafafine o Lasalo?

Tali: O Maria ma Mareta

3. Na faapefea ona toe faaola e Iesu Lasalo?

Tali: Na fetalai Iesu, "Ina sau ia I fafo male tuugamau"

4. O le a sau aoaoga fou ua maua mai i le tala?

Tali: Tatou te mafaia mea uma pe a tatou faatuatua i le Atua

PESE- O le Atua e telē

A'OA'OGA-

1. E mafaia e Iesu mea uma

2. Ua manumalo Iesu ile oti

3. Ia toe faafoi le faafetai ile Atua

.....

MANATU TA'IALA AOKUSO:

"E I AI LE ATUA I MEA UMA"

O le Atua e na te silafia mea uma lava i le lagi ma le lalolagi. O le ala foi lea tatou te taofi ai, e i ai lava le Atua i mea uma o loo tatou soifua ma ola ai. O lenei masina ua amatalia if eau ma galuega, e ao ona manatua, o loo silafia e le Atua mea uma e tutupu i lo tatou ola.

ASO SA:

02 AOKUSO 2026

MATAUPU:

UA TU'UINA E LE ATUA LE MANA

SINI:

Ia malamalama le vasega o le Atua na te silafiaina mea uma ma e leai fo'i se mea e faigata ia te Ia.

TUSI FAITAU: Esoto 16:1-18

FESOASOANI MO FAIAOGA:

O ai ea se tasi e tusa ma le Atua? Auā o le Atua o Ia o le silisiliese, o le Atua mata'utia, e malosi ma mamalu. E leai se mea e le i faia e Ia i le lalolagi. E tau faamatala faapena le uiga o le upu Mana mo le malamalama o i tatou i le fanau. O lona uiga o le tuuina ifo o le Mana o le Atua, o le faaalua lava lea o lona silisiliese ma lana pule aoao i le lalolagi.

I le tatou mataupu o lenei taeao, o lea ua lua masina ma aso e sefulu lima le faigamalaga a Isaraelu i lafanua o Moapi talu ona tuua o Aikupito le nuu sa latou nofo pologa ai. Peita'i o lea ua mautinoa e le faigofie le nuu, ona o tagata e femoumoua'i e le mafai ona tumau i le Atua. Ua tele fo'i vavega na molimau ai i Aikupito tainane o le vaeluaina o le sami ulaula, ae o lea lava e malaga ma le le talitonu ma le masalosalo. O vaivaiga ia o le nuu o Isaraelu o loo feagai ma nai auauna o Mose ma Arona. Ua lagona le iuleo o le muimui ma le faifai o le nuu o Isaraelu ona ua lagona le fia aai. Ua fai ane i latou, e sili lava Aikupito ai ana latou oti i Aikupito ao o nonofo i tafatafa o ulo e tunu ai aano o manu sa aai ma maoona. Talofa ua galo i tagata o Mose ma Arona o suli vaaia ia o le Atua i lo latou va feagai ai. O le muimui ia Mose ma Arona o le muimui lava lea i le Atua. Ua faafogaina e le Atua le muimui o tagata, o le ala lea o le faailoa o le mana silisili ese o le Atua, ma faia le vavega e ala i le faatotoina ifo o meaai ma ua aai ai le nuu. E leai se mea e faigata i le mana o le Atua. O mea e faigata i le

tagata e faigofie i le mana o le Atua e faamanatu ai pea ia Isaraelu e leai lava se isi atua e tusa ma le Atua o Isaraelu o le na laveaina i latou mai Aikupito.

E iai le mana o le Atua i mea uma lava. O Ia fo'i na te silafia uma mea uma e oo lava mafauauga lilo o le tagata. 'Aua fo'i nei galo o auauna a le Atua o ona sulivaia ia i le lalolagi e faatino lona finagalo. E leaga le ola faifai ma le tau muimui, a iai se mea mana'oga e fia maua ona o ole lea i le Atua e ala i le tatalo. E leai se mea e faigata i le Atua.

Uiga o Upu:

- i) Muimui - upu leaga (faitio)
- ii) Faatotoina - auina ifo
- iii) Tufa'aga - aano o manu

GALUEGA FAATINO: (A): Taaloga: "Ao le Mana"

- * Faia pepa laiti e foliga mai o falaoa laiti (mana).
- * Fa'asalalau i totonu o le potu/vasega.
- * Vavae atu le fanau i ni vaega se lua po o ni vaega se tolu.
- * Faitau le 1-10 latou te aoina ai le "mana" i le taimi puupuu.
- * A uma, fesili atu: "Aisea ua e naunau ai lava e soona fa'atele ni au mana e aoina, pe afai o le Atua e saunia? O lona uiga e lē uma le mana.

(E): Talanoaga (Discussion Group)

Fesili i fanau:

1. O le ā le mana?
2. Aiseā na fai atu ai le Atua ia aua ne'i teu le mana mo taeao (se'i vagana i le Sapati)?
3. O le ā le lesona mo i tatou i le aso lenei pe a tatou matuā manaomia se fesoasoani?

Faai'u i le manatu: *"E le tuulafoa'iina i tatou e le Atua; e na te saunia mea tatou te mana'omia i le taimi tonu"*.

PESE: O le Atua e tele (My God is so big)

A'OA'OGA:

1. E le lelei le ola muimui.
2. E silisili ese le Atua.
3. E iai le Mana o le Atua I mea uma.

.....

ASO SA 09 AUKUSO 2026 ASO SA O TAMA:

MATAUPU: O SETEFANO LE TAMA FAATUATUA.

SINI: Ia malamalama le vasega o le faatuatua faamaoni i le Atua e lavatia ai puapuaga ma faigata.

TUSI FAITAU: Galuega 7: 54-60

FESOASOANI MO FAIAOGA:

O le ā fo'i le faatuatua tamaiti? Ioe o le faatuatua o le faamoemoe, o le faalagolago ma le mautinoa o mea e le o vaaia? O lenei aso Sa ua faapitoa mo tamā uma o Samoa. O le aso tatou te toe manatu ai ma faataua le sao o tama ua le gata o totonu o nuu ma le ekalesia ae faapea foi totonu o aiga i le tausaiaina o tatou le fanau. O le aso tatou te faafetai ai i le Atua ona o ni tamā lelei ua ia foa'i mo tatou le fanau. Tamaiti o le tusi faitau o lenei aso, o le taimi ua amata ona tupu le ekalesia i Ierusalema. Ua moomoia e le Au Aposetolo nisi tagata e fesoasoani i le tufatufaina le oloa mo tagata o loo moomia le fesoasoani

i le ekalesia. O le ala lea ua filifilia ai uluai tiakono e to'afitu e aofia ai ma Setefano. O le auauna ua matata'u ma ua faatumuina i le Agaga o le Atua. O le ala lea o le lē fefe o Setefano i le tau faamata'u o ta'ita'i o le lotu Iutaia ma e na tetee a ua ia faatino pea ma le faamaoni ona faiva e ala i le molimau ia Keriso Iesu. Ua faalogo i latou i le molimau a Setefano ona matuā faatumulia ai lea o i latou i le loto tiga, ua pupuni o latou taliga ma ua alalaga ma le leo tele. A Setefano ua faatumuina o ia i le Agaga o le Atua. Na ia pulatoa ane fo'i ma vaai i le lagi ua iloa atu le malamalama o le Atua ma Iesu o loo nofo i le itu taumatau. Ua latou ave ia te ia i tua aai ma ua fetogi ia te ia i maa. Tamaiti ese le mata'utia o vavega e faia e le faatuatua, ao fetogi Setefano i maa, ua valaau o ia i le Atua "Le Alii e Iesu, ia e talia mai lou nei agaga." Tamaiti ua toe valaau fo'i Setefano i le Atua ina ia faamagalo i te i latou. O Setefano o le tagata e faatuatua i le Atua. O lea lava ua oo i faafitauli ua afaina ai le ola ae o loo tumau pea le faatuatua i le Atua. O le isi faiva o le faatuatua le fanau e pei ona faia e Setefano, o le faamagalo atu i le ua agaleaga mai. Ioe le fanau o le fesili. E mafai e tatou ona faatuatua faapei o Setefano? Ioe e mafai fo'i e tatou peafai e faatuatua i tatou i le Atua ma alolofa faamaoni ia te Ia. Tamaiti e faapena galuega na faatino e nai o tatou tamā. E le i faavaivai i faigata ma faafitauli ae na taula lo latou faatuatua i le Atua ina ia tatou manuia. Lo latou soifua faatuatua ua aoaoina ai fo'i i tatou ina ia tatou fiasia e faitau le Tusi Paia ma tatalo i le Atua e le aunoa ina ia ave fa' i i tatou o ni fanau faatuatua. Ia manuia tele le Aso Sa o Tamā.

GALUEGA FAATINO: TUSITUSIGA

Ia tusi sau solo e faailoa ai lau faafetai i lou tamā ona o lana tausiga ma ia faamanauia iai le Aso Sa o Tamā. Ia lua fuaiupu le umi o le solo. Ia fa laina i le fuaiupu e tasi. - **ULU SOLO: O LO'U TAMA**

PESE: Pese ma Viiga 175

A'OA'OGA:

Ia faamaoni i lou valaauina.

O le agaga o le Atua e faatupuina lo tatou faatuatua.

E mafaia mea uma i le faatuatua faamaoni i le Atua.

.

.....

ASO SA: 16 AOKUSO 2026

MATAUPU: O ELIA MA PEROFETA A PAALA.

SINI: Ia malamalama le vasega e tasi lava le Atua.

TUSI FAITAU: 1 Tupu 18:21- 40

FESOASOANI MO FAIAOGA

Ua mavae atu lena Aso Sa sa faamanatuina ai le Aso Sa taua mo tamā, Viia le Atua. O le tatou mataupu i lenci taeao, O Elia ma perofeta a Paala. O Elia o le perofeta a le Atua. I le tusi sa tatou faitauina o loo faamatalaina ai le perofeta o Elia ma perofeta a Paala ma a latou taulaga sa faia, e iloa ai poo ai le Atua moni. Ua faapotopoto le nuu uma, ona fai atu lea o Elia iai latou uma "Pe tou te faaletonu i manatu e lua seia afea? Afai o le Alii le Atua, ia outou mulimuli atu ia te Ia, ae afai o Paala mulimuli atu outou ia te ia. Peitai ua leai lava se tasi o le nuu e tali atu ia te ia. O le taimi lea ua toe lava o Elia le perofeta a le Atua o loo totoe, Ao perofeta a Paala e toa selau limasefulu.

Ua tapena mea e faatino ai a latou taulaga, o povi e lua, ma fafie ae leai se afi. O le afi tamaiti o le vaega lea o loo faatali iai le nuu poo ai o le Atua o le perofeta o Elia, ma Paala e aumai ai le afi e faamu ai a latou taulaga. O iina e iloa tonu ai le Atua moni ma matautia. Ua amata taulaga a perofeta a Paala i le taeao, ua latou faaee le povi i luga o le fatafaitaulaga ma latou valaau atu i le igoa o lo latou atua o Paala ua

faapea atu “Paala e faafofoga mai ia te i matou”. Ua fiu e faatali e le i tali mai lava se tasi. Ua vaai atu Elia ona tauemu ai le o ia ma aamu atu ia te i latou ma fai atu, “ai lava o moe lo outou atua, se fafagu i a te ia”. Ua mavae le tu tonu o le la ae ua leai lava se tasi e tali mai. Ua fai atu Elia i le nuu uma, ina faalatalata mai ia ia te a’u. Ua ia tapena le fata faitaulaga ma sauni mea e fai ai taulaga i lona Atua. Ua ia faafu i fafie ma pena le povi ua faatumu foi le kate i vai ma sasaa i luga o le taulaga ma fafie. Manatua foi tamaiti o le afi o loo saili ai poo ai o le Atua o Elia ma le atua o Paala e tali mai ma aumai se afi e faamu ai taulaga. Ua oo i le taimi e fai ai taulaga ona valaau atu lea o Elia le perofeta ua faapea atu “Le Alii e, le Atua o Aperaaamo ma Isaako ma Isaraelu ia faailoa mai i le aso nei o oe o le Atua o Isaraelu o au foi o lau auauna ua ou faia nei uma e tusa ma lau afioga”. Ia e faafofoga mai le Alii e ia iloa e le nuu o oe o le Atua ma ua e faaaliliuina o latou loto. Ua pau ifo mai le lagi le afi ma faaumatia ai le taulaga mu. Ua vaavaai iai le nuu ona latou faapau ai lea ma faapea atu O le Alii le Atua ia. O le Alii o le Atua ia.

Ioe tamaiti e leai leai lava se tasi e tusa ma le Atua, ua na o ia lava e toatasi. E silisili ese ma matautia le Atua o loo tatou tapuai iai.

GALUEGA FAATINO: Faatino le tala

PESE: Ou te pese i le matautia (im singing wonderful)

A’OA’OGA:

1. E silisili ese lava le Atua.
2. E tali mai le Atua i le auauna faamaoni.

.....

ASO SA: 23 AOKUSO 2026

MATAUPU: O LE POTO O SOLOMONA

SINI: Ia malamalama le vasega o le poto o le Atua na faia ai e Solomona le faaiuga amiotonu.

TUSI FAITAU: 1 Tupu 3: 16-28

FESOASOANI MO FAIAOGA

E taua le poto tamaiti mo tatou uma, o le ala fo’i lea o le finau o nai matua e ave outou i le aoga ina ia avea outou o ni fanau e popoto ma atamamai ma ia iloa e tatou le fanau ona faia ni faaiuga e tatau ma lelei. A lelei ona aoaoina i tatou ma maua le poto e mautinoa e manuia fo’i lo latou lumana’i.

O Solomona o le Tupu o Isaraelu ina ua mavae Tavita lona tamā. O le tupu na tatalo i le Atua ina ia foai mai le poto ina ia iloa ona faamasino lona nuu ua toatele nauā. O le tatou mataupu o lenei taeao. O le poto o Solomona. O fafine e toalua sa faia le finauga ia la pepe. O le tasi pepe o loo ola ae o le tasi ua oti. I le tasi o po, ua ave faagaoi ai e le fafine ua oti lana pepe le tama a le tasi o tina. Ua ia fesua’i pepe ma ua finau pepelo. O le ala lea o le oo i luma o le tupu o lea mataupu ona ua faigata ona maua se tasi.

Ona faapea mai lea o le tupu o Solomona, ina aumaia ia te a’u o se pelu. Ua faapea atu fo’i le tupu ina isi lua ia le tama o loo ola ma avatu ia tofu i la’ua ma le itu. Ona tagi leotele lea ma alaga le fafine e ana le pepe o loo ola ma faapea ane i le tupu, “Le Alii e. avatu ia le tama o loo ola ia te ia ae ‘aue nei fasi oti ia te ia.” Ua tali ane le tupu “ina ave ia le tama o loo ola ia te ia auā o lona tina moni lena” Ua faalogo Isaraelu uma i le faamasinoga ua faia e le tupu o Solomona ona matata’u ai le o i latou auā ua latou iloa ua ia te ia le poto mai le Atua e faamasino ai lona nuu.

Tamaiti e leai se mea e faigata pe a maua e tatou le fanau le poto mai le Atua. Ia tatalo pea i le Atua e le aunoa ina ia tatou maua lana meaalofa o le poto. E mafai ai ona tatou faia faaiuga sa’o ma amiotonu e tusa ma le finagalo o le Atua.

GALUEGA FAATINO: TUSITUSIGA

Tusi se solo e tasi le fuaiupu (6 laina). Ulusolo: E aoga le potō.

PESE: Iesu e, ua ou valea

A’OA’OGA:

1. E tāua le potō.
2. O le Atua o le faapogai o le potō

.....

ASO SA: 30 AOKUSO 2026

MATAUPU: IA ONOSA’I MA MATAALA.

SINI: Ia malamalama le vasega, e tataui i Kerisiano uma ona mataala ma onosa’i i le fili ma le ti’apolo.

TUSI FAITAU: 1 Peteru 5:8-11

FESOASOANI MO FAIAOGA:

O le tusi muamua a le Aposetolo o Peteru o se tasi lea o tusi tāua i le Feagaiga Fou, aemaise lava i le faamalosiaua o Kerisiano i taimi o tofotofoga. Na tusia lenei tusi i se vaitaimi faigatā tele i le olaga o le Ekalesia i le senituri muamua, pe tusa o le tausaga 60–65 T.A., i lalo o le malo o Nero, le emeperoa o Roma. O le au Kerisiano sa feagai ma sauaga, upu fa’alumaluma, ma sauāga faaletino ona o lo latou talitonuga ia Iesu Keriso. O nisi o i latou na ave i fa’amasinoga, a o nisi na fa’afalepuipuiina ma fasiotia. I totonu o nei faigatā, na tusia ai e

Peteru lenei tusi e faamalosiaua ai i le au talitonu ina ia tumau i le faatuatua, onosa’i, ma mataala i le Atua.

I le tala sa faitauina, o loo aumaia ai e Peteru se ata e faamatala ai le gaoioiga a le tiapolo. Ua ia faatusaina le tiapolo i se leona tagi o loo savali solo e saili se tasi e na te aina. O le ata lea e fa’ailoa mai ai le mata’utia o le fili fa’aleagaga. O le tiapolo e lē filemu, e lē moe, ae o loo galue pea ma faifai pea i le fa’aumatiaina o le au faatuatua. O lenei ata o le leona na matua faigofie ona malamalama i ai tagata i lenei taimi, auā o le leona, e lauiloa tele ona o se manu fe’ai, malosi ma sauā. O lea ua fa’atusa i ai le malosi o le ti’apolo, ma lona naunau ina ia fa’aumatia ma tineia le Talalelei ia Iesu Keriso, lea ua fa’a-Talaleleiina ai le au talitonu i lea vaitau.

A oo ina tagi le leona e mataala uma isi meaola o le fanua, e oo lava foi i le tagata. Ua fa’atusa i ai le au Kerisiano ina ia matuā mataala i le fili ma le ti’apolo. Ia onosa’i i le sauāina ma tigā o le avea ma Kerisiano. Ia lē avea le malosi o le ti’apolo ma ana faiga, e aveesea ai lo latou talitonu i le Talalelei ia Iesu Keriso.

O le fa’amanatu a Peteru i le au Kerisiano fa’atuatua, o le Atua lava Ia, o le Atua o le alofa mutimutivale, o le a Ia toe fausia, fa’amalosia, fa’amautu, ma fa’atumauina i latou uma e tumau i le faatuatua. O lona uiga, e ui ina faigatā le olaga, ae o loo i ai pea le Atua e avatu le malosi fou, o le faamalosi, ma le filemu.

O le olaga Kerisiano i aso anamua ma aso nei, o se olaga e tumu i tofotofoga, ae o se olaga fo’i o loo i ai le faamoemoe e le mafai ona fa’atafunaina, auā o le Atua o le alofa mutimutivale o loo lotolotoi i tagata uma e talitonu ia te Ia.

GALUEGA FAATINO:

(A): Tusi Ata / Poster.

Ia saunia ni pepa (card boards) se 3. Vaevae le vasega i vaega se 3, ma ia tofu le vaega ma le pepa. Fai i vaega ta’itasi, ina ia tusi se ata o le “leona tagi” ma ni mea e puipui ai i latou. (faata’ita’iga: Tatalo, Tusi Paia, Ekalesia, Uō lelei, ma isi).

O le sini, o le ata e avea ma faamanatu: e i ai pea le fili, ae e sili atu le malosi o le Atua e puipui ai i tatou.

(E): Taaloga: “Tetee i le Leona”

- Ia tofia se tasi e fai ma “leona,” ma isi se to’a 5 e fai ma kerisiano.
- A savali le “leona” ma taumafai e tago i se tasi, e tatau ona vave atu le isi e alaga “Tetee i le tiapolo i le suafo o Iesu!”, o tu lea o le leona.

O le a’oa’oga: E mafai ona tatou tete’e atu i le fili pe a tatou lototele e valaau i le suafo o Iesu.

(I): Fai se tatalo faatasi.

Fai i tamaiti ia tusia i se fasipepa se tasi o faaosoosoga o loo feagai ma ia (faataita’i: uō leaga, telefoni, faalogogata).

A mae’a ona aoina lea e le faiaoga ma fai se tatalo faatasi, ole atu i le Atua ia fesoasoani i tamaiti taitoatasi e onosa’i ma mataala.

PESE: Ou te fia alu i le aoga aso Sa.

Ou te fia alu i le aoga aso Sa	I want ot go to Sunday School
Ou te pese ma vivii i le Tamā	To sing and praise the Lord
Ou te fia alu i le aoga aso Sa	I want to go to Sunday School
E fa’alogu i tala ia Iesu	To hear the stories of Jesus
A sau Satani e fa’aosooso mai	If Satan comes down and tells me
E fa’amisi le aoga aso Sa	To skip the Sunday School
Ou te tuli i fafo ma ou fai i ai	I’ll chase him away and tell hi so
“E PULE IESU IA TE A’U”	“I’M ONLY BELONGS TO JESUS”

A’OA’OGA:

1. Ia fa’amaoni i le avea ma tagata talitonu ia Iesu Keriso.

2. Ia onosa’i i faigata ma puapuaga ona o le Talalelei ia Iesu Keriso.
3. Ia mataala i le fili ma le ti’apolo i taimi uma o le ola.

.....

MANATU TA’IALA SETEMA:

“FAI MA TAGATA O LE TALALELEI”

O le masina leneo i tausaga ta’itasi, e fa’amanatuina ai e le Ekalesia le taunuu mai o le Talalelei i o tatou laueleele. O le ala foi ua saunia ai mataupu e faatatauina lava i le Talalelei ma lona aogā i le olaga o le tagata. O le fa’amoemoe lava, ina ia a’oa’oina ai fanau a le Ekalesia, i le tāua o le olaga ua fa’a-talaleleiina.

ASO SA: 6 SETEMA 2026

MATAUPU: LOTOTELE E FA’AILOA LE TALALELEI

SINI: Ia malamalama le vasega o le lototele, o le tagata ua tumau lona loto ma le fa’amaoni ia Iesu Keriso.

TUSI FAITAU: Galuega 4:1-22

FESOASOANI MO FAIAOGA:

O le tala o lenei aso Sa, e amata mai i le mea na tupu i le Galuega e 3, ina ua faamālōlō e Peteru ma Ioane le tagata pipili sa nofo i le faitotoa o le malumalu i Ierusalem. O le tagata lea na lauiloa i tagata uma ona o le tele o tausaga o ia nonofo ma aoi i le faitotoa. Ina ua ia savali,

osooso, ma vivii i le Atua, sa matua ofo ma fialia le motu o tagata, ma ua fai ma ala ua faapotopoto ma ua fa'atumulia ai totonu o le malumalu. Na faaaoga e Peteru le avanoa e tala'i ai i le motu o tagata ua tumutumu atu, le Talalelei e uiga ia Iesu Keriso, o Lē na latou faasatauroina, ae na toe faatuina e le Atua. Na ia fa'amalosia tagata ina ia salamo ma liliu atu i le Atua, ina ia soloia a latou agasala (Galuega 3:19).

Peita'i, na avea ma ala na matua lē fialia ai le 'au ositaulaga, o leoleo o le malumalu, ma le 'au Satukaio i lenei tala'iga. O le 'au Satukaio, o se vaega fa'alelotu a Iutaia, e lē talitonu i le toetū o le tino po o se ola i tua atu o le oti (Mataio 22:23; Galuega 23:8). Sa tupu lo latou ita ona o le a'oa'o atu a Peteru ma Ioane e fa'atatau i le toetū o Iesu mai le oti.

Na fai ma ala sa o latou pu'e ai ma saisi i a Peteru ma Ioane ma taofia i le falepuipui i le po atoa. I le taeao na soso'i ai, na aumai i la'ua i luma o le fono maua luga a le 'au Iutaia, e aofia ai le 'au ositaulaga sili, o le au Faresaio ma le au Satukaio.

Na fesiligia i la'ua, pe mai fea le pule, ma le sua fa na la'ua faia ai lea mea. Sa faatumuina pea i la'ua e le Agaga Paia, ma tali atu Peteru ma le lototele, ma faailoa atu o le tagata pipili na faamālōlōina i le sua fa o Iesu Keriso le Nasareta. O Lē na latou faasatauroina ae toe faatuina e le Atua. Na ia faapea ane, e leai lava se isi e faaolaina ai, ua na o le sua lava o Iesu Keriso. (Galuega 4:12).

Sa ofo tele le le fono maua luga a le 'au Iutaia, lea e aofia ai le 'au ositaulaga sili, o le au Faresaio ma le au Satukaio i le lototele o Peteru ma Ioane, ona o i la'ua o ni tagata e leai ni tofiga faa-le-lotu Iutaia, ma e le masani i a'oa'oga faalelotu. Ae sa iloa lelei e le au ositaulaga sili ma tagata maua luga o le lotu Iutaia, o i la'ua sa mafuta faatasi ma Iesu.

O le mafuaaga foi lea na o latou taumafai malosi ai lava, e fa'asā ona toe tautatala i le sua fa o Iesu, ae sa tumau pea le tali a Peteru ma Ioane. I lo la'ua manatu, e tatau ona usiusitai i le Atua nai lo tagata. E le mafai ona lē tautala i mea ua latou vaai ma faalogo i ai. O foliga na o le lototele e fa'ailoa le Talalelei ia Iesu Keriso. E lē avea le malosi o le pule sauā ma le lē talitonu o i latou o loo fai ma ta'ita'i o le nuu aemaise o le atunuu, e fai ma ala e fefe ai ma taofia le naunau e fa'ailoa le

Talalelei a Keriso. Mo i tatou o tamaiti a'oga aso Sa, aua le fefe e tautala i le mea moni. Aua foi le palaai e tautatala i le Talalelei ia Iesu Keriso.

GALUEGA FAATINO: 1. Talanoaga o Fesili Tatala.

1. Aiseā e te manatu ai na le fefe ai Peteru ma Ioane e ui na saisi i laua?
2. O le ā le uiga o le “lototele” i le faailoa atu o le Talalelei i lou olaga i aso nei?
3. O ā ni tulaga e faigata ai ona e faasoa atu le upu a le Atua i lou siosiomaga?

2. Fa'ata'ita'iga o se Tala.

Vaaiga i totonu o ose fa'amasinoga. Tagata Lototele – faatino Peteru ma Ioane o loo talanoa i luma o ta'ita'i o le lotu Iutaia. Faaii i le aotelega: “E tatau ona tatou usiusitai i le Atua nai lo tagata.”

PESE: Tatou te o i luma mo le Alii.

A'OA'OGA:

1. Aua le fefe e fa'ailoa le Iesu i soo se mea.
2. Ia fa'alogi i le Agaga o le Alii, ae le o tagata.
3. E malosi le Talalelei nai lo le talaleaga.

.....

ASO SA: 13 SETEMA 2026

MATAUPU: O LE LIUA O SAULO

SINI: Ia malamalama le vasega, o le finagalo o le Atua na liua ai Saulo ina ia avea ma auauna o le Talalelei.

TUSI FAITAU: Galuega 9:1-19

FESOASOANI MO FAIAOGA:

O Saulo na fanau i le aai o Taso i Kilikia. O ia o se tagata Iutaia, ae o ia foi o se tagatanuu o Roma, (Galuega 22:25–27). Sa a'oa'oina o ia i Ierusalem a lalo o le faiaoga lauiloa o Kamalielu, o se tasi o le au Farasaio sa maua lona tulaga, ma sa lelei tele lona malamalama i le Tulafono a Mose, o tusitusiga i le Feagaiga Tuai, aemaise o tu ma aga a tagata Iutaia.

Ua amata ona tupu ma ola le Ekalesia Kerisiano. O le talitonuga fou e faavae i le tala'iga e faapea o Iesu o le Mesia ua toetu mai le oti ma le tuugamau. Na manatu ai le au Farasaio ma le ta'ita'i o le lotu Iutaia, o se tafa'amatau i le mamalu o le Tulafono ma le tapuaiga masani. Ua tupu le naunauti i o le lotu o Saulo e puipui le tapuaiga Iutaia, ua avea ai ala ua finau ai ina ia tuliloa, saisi, ma faasauā i tagata ua avea ma Kerisiano (tagata ua talitonu i le Talalelei ia Iesu Keriso sa maliu ma toetu manumalo mai le oti).

Sa fa'ataunuu lava le tuliloa a Saulo, ma ua avea ai ma ala na sosolo ai Kerisiano i isi taulaga, ma ua tupu tele ai le ita o Saulo ma lona naunau lava e tapu'e uma i latou. Na ia talosaga atu i le ositaulaga sili mo se tusi faataga e alu atu ai i Tamaseko (o se taulaga taua i Suria) e saisi soo o Iesu ma toe aumaia i Ierusalem mo le faamasinoina.

I le ala atu mo Tamaseko, na tupu ai le mea na suia ai lona olaga e faavavau, ina ua a susulu mai se malamalama malosi mai le lagi, ua taia ai Saulo ma ia pa'u i le eleele. Na ia faalogo i le leo "Saulo, Saulo e, sea le mea ua e sauā mai ai ia te a'u?" O le fesili a Iesu na faailoa ai, o le faasauā i Kerisiano o le faasauā lea ia te Ia. O lenei feiloaiga ma Iesu ua toetu mai na suia atoatoa ai le olaga o Saulo, mai le avea o ia ma fili

o le Ekalesia i le avea ai ma ana tagata faigaluega ua sili ona malosi mo Iesu ma lona finagalo.

O le tauaso o Saulo mo aso e tolu na tapenaina ai lona olaga faaleagaga, auā e ui sa ia manatu ua ia iloa le upu moni, ae sa tauaso lona lotu ma le mafau. Na fetalai atu le Atua ia Anania, o se soo i Tamaseko, e alu atu ma tatalo mo Saulo. E ui i le fefe o Anania ona o le igoa leaga o Saulo, ae na usita'i lava. Ina ua tatalo Anania, na pa'ū ese le mea e pei o se pa'u mai mata o Saulo, ma toe maua ai lana va'ai. Sa papatisoina Saulo, suia lona igoa ia Paulo, ma amata loa le tala'i atu o Iesu o le Alo o le Atua.

O lenei mea na tupu ia Saulo na avea ma se tasi o liua sili ona ofoofogia i le Tusi Paia. O le tagata sa sili ona tafa'amata'u i le Ekalesia, na avea ma tagata autū i le salalau o le Talalelei i atunuu eseese o le lalolagi.

GALUEGA FAATINO:

1. Tusia se "Before & After Chart"

Saunia se siata (chart), ona vaelua lea. O le isi afa, ia tusia ai se ata o le olaga tuai o Saulo (Before): sauā, tapu'e le au Kerisiano, saisi ma taumafai e fa'aumatia, ofu fitafita, pelu ma isi. O le isi afa o le siata, ia tusia ai le ata o Paulo (After): auauna a Keriso (faifeau), tusi Paia, lauga atu, alofa i le au Kerisiano ma isi.

2. Toe faatino le tala:

Vaega 1: Saulo i le ala i Tamaseko

Vaega 2: Feiloaiga ma le malamalama

Vaega 3: Anania ma Saulo

Vaega 4: Saulo ua liua ma amata folafola atu le Tala Lelei.

PESE: Jesus Loves Me.
 Jesus loves me, this I know, For the Bible tells me so.
 Little ones to Him belong, they are weak but He is strong.

CH: Yes, Jesus loves me, Yes, Jesus loves me,
 Yes, Jesus loves me, The Bible tells me so.
 Jesus loves me, He who died, Heaven's gates to open wide,
 He will wash away my sin, Let His little child come in.

Jesus loves me, loves me still, Though I'm very weak and ill,
 From His shining throne on high, comes to watch me where I lie.

A'OA'OGA:

1. E mafai e le Atua ona suia so'o se tagata mo le lelei.
2. Aua le tete'e i le Talalelei ia Iesu Keriso.
3. Ia lototele e usiusitai i le valaau a le Atua.

.....

ASO SA: 20 SETEMA 2026

MATAUPU: MALAGA A PAULO E FOLAFOLA LE TALALELEI

SINI: Ia malamalama le vasega i le amataga o le fa'atinoga o le valaauina o Paulo.

TUSI FAITAU: Galuega 13:1-12

FESOASOANI MO FAIAOGA:

O le tusi o Galuega o le 'Au Aposetolo e le gata o se tala o galuega a Peteru ma le Ekalesia i Ierusalem, ae o se tala foi i le sao tele o le toaina o Paulo i le tala'i atu o le Talalelei i atunuu ese. O le mataupu o lenei aso Sa, e tusa o le tala sa tatou faitauina, o le amata ai o le ulua'i malaga faamisionare a Paulo, faatasi ma Panapa.

O le aai o Anetioka i Suria, o le nofoaga autu lea na salalau atu ai le Talalelei i tagata ese (tagata e le o ni Iutaia). Na avea Anetioka ma nofoaga taua mo le tuputupu a'e o le Ekalesia, ona o lona tulaga i luga o auala tetele mo femalagaiga ma fefaatauaiga i le Malo o Roma. O le Ekalesia i Anetioka sa aofia ai ta'ita'i eseese ma tagata mai atunuu ese. O se faailoga o le galuega faa-Kerisiano e le gata i tagata Iutaia, ae aofia ai ma tagata o nuu ese.

A o latou tapuai ma anapogi, na fetalai ane le Agaga Paia, e tataua ona tuueseese Paulo ma Panapa mo le galuega sa Ia valaauina ai i laua. O lenei valaau e le mai tagata, ae o se filifiliga mai le Atua lava Ia, ma o le anapogi ma le tatalo a le Ekalesia na avea ma auala e faamaonia ai lenei filifiliga.

Na amata le malaga i le motu o Kuperu, lea e tupuga mai ai Panapa. O Kuperu o se nofoaga taua o fefaatauaiga i le Metitirani, ma sa tele tagata Iutaia ma tagata ese na i ai. I le taulaga o Pafo, na fetaia'i ai Paulo ma Panapa ma Elima le faataulaitu (o lona igoa foi o Paiesu), o le sa taumafai e taofia le kovana o Sekio Paulo mai le talitonu i le Talalelei. Na tumu Paulo i le Agaga Paia ma faailoa atu le faasalaga a le Atua i le fa'atauasoina e faavavau o Elimasa mo sina taimi. O le vave ona taunuu o lenei mea na avea ma molimau malosi mo le kovana, ma ia talitonu ai i le afioga a le Alii.

O le amataga o le galuega faamisionare a Paulo, lea na oo atu ai le Talalelei i atunuu e le o Iutaia, ma o loo faaalai ai foi le mana o le Agaga Paia i le tauaveina o le galuega. O ni va'aiga matagofie o loo i totonu o le tala o lenei aso Sa, e afi ai, "O le valaau a le Atua e manino ma ala mai i le Agaga Paia". E pei ona valaauina Paulo ma Panapa, e valaau foi le Atua i tagata taitoatasi mo galuega eseese i le Lona Malo.

“O le taua o le anapogi ma le tatalo” ona o ni galuega faaleagaga e fesoasoani i le faalogo ma le faailoaina o le finagalo o le Atua. O le mea ua mautinoa, e i ai pea le tetee a le ti’apolo i le tala’i atu o le Talalelei. E pei o le tetee a Elima, i le taumafai e taofia le galuega a le Atua. Peita’i, e sili atu le malosi o le mana o le Agaga Paia, ona o le Agaga o le Atua. Le malosi lea o le Agaga Paia na talitonu ai le Kovana o Sekio Paulo i le Talalelei ia Iesu Keriso. Ma o le pine lenā o le amataga o le galuega a Paulo.

GALUEGA FAATINO: TALIGA FESILI

Tali i fesili o le Tala sa fa’amatalaina.

1. O fea na amata ai le ulua’i malaga a Paulo ma Panapa?

Tali: O Anetioka i Suria.

2. O ai na fetalai e tuueseese Paulo ma Panapa mo le galuega?

Tali: O le Agaga Paia.

3. O le ā le igoa o le fa’ataulaitu na tete’e i le Talalelei?

Tali: O Elima (poo Paiesu).

4. O ai le kovana na talitonu i le afioga a le Alii?

Tali: O Sekio Paulo.

5. O le ā le mea na tupu ia Elima i le fa’asalaga a le Atua?

Tali: Na tauaso mo sina taimi.

PESE: Olioli i le Alii, o lo’u malosi lea.

A’OA’OGA:

1. Fiafia e fa’aaoga le malosi mo le galuega a Keriso.

2. Ia lototele i fa’afitauli o le avea ma Kerisiano.

3. E au le Agaga o le Atua i mea lelei uma tatou te faia

ASO SA: 27 SETEMA 2026

MATAUPU: SUIGA I LE ALOFA O KERISO

SINI: Ia malamalama le vasega, o le ola ua ia Keriso, o le ola ua fa’asa’olotoina mai le pologa.

TUSI FAITAU: Filemoni 1:8–21

FESOASOANI MO FAIAOGA:

O le tusi i a Filemoni o se tasi lea o tusi mai le falepuipui a le toeaina o Paulo, i le taimi na falepuipui ai o ia i Roma. O lenei tusi e ese mai le tele o tusi a Paulo, ona o se tusi patino, i se tasi o tagata Kerisiano e suaia ia Filemoni. O ia o se tagata mau’oa i Kolose ma o se ta’ita’i o le Ekalesia i lona aiga.

O le autū o lenei tusi o le mataupu i le tagata e igoa ia Onesemo. O Onesemo o se pologa a Filemoni, ae na sola ese mai lona alii. E foliga mai na ia gaoia ni mea e patino i lona alii o Filemoni ma mafua ai ona sola. I lana solaaga, na oo atu ai o ia i Roma, ma o iina na ia feiloa’i ma mafuta ai ma Paulo o loo i le falepuipui.

I le feiloa’i ai o Paulo ma le pologa o Onesemo, na faalogo ai Onesemo i le Talalelei, ma liua ai o ia e avea ma Kerisiano. Na avea o ia ma fesoasoani pele ia Paulo i le falepuipui, ma avea ma "atalii faaleagaga" ia Paulo (Filemoni 1:10). Ae e ui i lea, sa iloa lelei lava e Paulo, e tataua ona fa’aleleia le sootaga a Onesemo ma lona alii o Filemoni. O lea la na ia tusi atu ai lenei tusi, e le gata o se tusi o se fautuaga, ae o se tusi o le alofa, o se faamagaloga, ma le faafouina o sootaga.

I lana tusi, na talosaga atu ai Paulo i le alofa o Filemoni ina ia talia le toe fo’i atu o Onesemo, ma ia lē o se pologa, ae o se uso i le Alii. O se ata malosi lenei o le suiga e faia e Keriso, ona o le tagata sa gaoi ma sola ese, a’o lea ua avea nei ma uso pele i le talitonuga fa’a-Kerisiano.

O le tagata ua talia Iesu i lona ola, ma ua sa'oloto mai uiga leaga o le lalolagi sa ola ai.

Tatou tama ma teine o le aoga aso Sa, e mafai e le Talalelei ona suia so'o se tagata. Sa pologa ma solitulafono Onesemo, ae ua avea ma auauna aogā i le galuega a le Atua. O le tala foi o lenei aso Sa, o loo manino mai ai, e mafai e le faatuatua ona toe faaleleia sootaga. Na toe faafo'i atu e Paulo le taule'ale'a o Onesemo i lona alii, ma fai atu ia Filemoni e taliaina o ia i le alofa. O le loto fa'amagalo e faavae i le alofa e pei ona talosaga Paulo, e le o le tulafono na ia faamalosia ai Filemoni, ae o le alofa. O le alofa ua tupu i le loto, ina ua ola i le Talalelei ia Iesu Keriso, le Talalelei e fa'avaeaina i le alofa.

GALUEGA FAATINO: (A):

FESILI MO SE FA'ATALANOAGA.

Tuuina i le vasega fesili nei pe a uma ona fa'amatala le tala.

1. Aiseā na sola ese ai Onesemo mai Filemoni?
2. O le ā le mea na tupu ia Onesemo ina ua feiloa'i ma Paulo?
3. Aiseā na talosaga ai Paulo ia Filemoni ina ia taliaina Onesemo?
4. O le ā se sootaga fou na maua i le va o Filemoni ma Onesemo i totonu o Keriso?

(E): **FA'AMATALAINA O TALA'AGA.**

Vaelua tamaiti i vaega se tolu. Ia tofu le vaega ma ni fa'amatalaga o tagata o loo i ai i le tala. O talaaga/fa'amatalaga (background), o galuega fai/valaauina (roles/duties), o o latou tulaga (status).

1. Paulo – o le tusitala o le tusi.
2. Filemoni – le alii e ona Onesemo.
3. Onesemo – le pologa na sola ae ua liua.

PESE: O le alofa o le Atua pei o se li'o tele.

A'OA'OGA:

1. Talia Iesu i lou ola e sa'oloto ai.
2. O le ola i le leaga ma le agasala, e lamatia ma pologa.
3. Alofa i le tagata ua liua e avea ma Kerisiano.

MANATU TA'IALA OKETOPA:

“AVEA MA TALAVOU FA'AMAONI”

O le masina lenei o loo fa'atāuaina ai fanau, e ala i le latou aso Sa. O le fa'amoemoe mo fanau ina ia o latou iloa lo latou tāua e ala i lo latou avea ma tamaiti o aoga aso Sa, autalavou ma fiafia i le Talalelei ia Iesu Keriso. O loo fa'atatau i ai mataupu o lenei masina ina ia saga tapenaina ai pea lo latou ola a'o avea ma fanau ua faa-Kerisianoina.

ASO SA: 25 OKETOPA 2026

MATAUPU: O SE TALAVOU GALUE FA'AMAONI

SINI: Ia malamalama le vasega, o le fa'amaoni ma le ola fa'alagolago o le tama ma le teine i le Atua, e ola manuia.

TUSI FAITAU: 1 Samuelu 17:34–37

FESOASOANI MO FAIAOGA:

A o lei avea Tavita ma tupu, sa muamua ona avea o ia ma leoleo mamoe a lona tamā o Iese i Peteleema. O lenei galuega e le'i taua tele i tagata, peita'i o se galuega e faigata ma e mana'omia le tagata e faamaoni, onosa'i ma lototele. O le galuega a le leoleo mamoe o le tausima le

puipuia o le lafu mamoe mai manu fe'ai, e pei o leona, ma urosa. O tama'i mamoe e vaivai ma faigofie ona osofa'ia, ma o le mea lea e tatau ai i le leoleo mamoe ona mataala i le po ma le ao.

E ui o lenei galuega e lē amanaia ma fia galue ai le to'atele o tagata, ae o i inā na a'oa'oina ai Tavita i le faamaoni i mea laiti ma le faalagolago i le Atua. Sa ia iloa o lona malosi e le gafatia e taofia ai manu fe'ai. Ua na o le fesoasoani mai o le Atua na mafai ai ona ia fa'aola ma malutia ai le lafu mamoe o lona tamā. O le poto masani lea na fausia ai le loto lototele o Tavita ma lona loto faatuatua, lea na saunia ai o ia e feagai ma tofotofoga tetele i le lumana'i.

Ina ua tupu le pala'aai o Isaraelu i se tasi o aso, i se tasi e tau ma Koliata le toa o Filisitia, na ofo ai Tavita ma lona loto e le'i fefe, ina ia fa'ato'ilaloina lea toa sauā. Na manatua lelei e Tavita fa'atinoga o mea tetele na ia faia ona o le Atua i aso ua mavae. O upu a Tavita e faamaonia ai, "O le Alii na Ia lavea'i 'iā te a'u nai le lima o le leona ma le lima o le urosa, o Ia lava na te lavea'i 'iā te a'u a i le lima o lenā Filisitia." (f.37). O lona uiga, na avea lana galuega faaleoleo mamoe o se a'oga faaleagaga na saunia ai o ia e avea ma ta'ita'i tele o le nuu o Isaraelu.

O le tala lenei e faaali mai ai le tāua o le faamaoni i galuega laity ma fa'atauva'a i le vaai. O mea e manatu tagata e lē tāua, ae mafai ona fa'aaogā e le Atua e fausia ai tagata e faia galuega tetele mo lona finagalo. E le gata i lea, ae ose fa'ata'ita'iga lelei mo tupulaga talavou uma, ua soona fa'aaoga sesē le malosi i mea lē aogā i lenei vaitau o le soifua ma le ola. Ua a'oa'o mai le tala ia Tavita, o le talavou sa fa'amaoni i ana galuega sa fai, ma fa'amoemoe i lona Atua e fa'atasi mai ma fesoasoani mai.

GALUEGA FAATINO:

(A): **Ata Tusitusi / Poster.**

Tusi pe vali se ata e fa'aalia ai Tavita o le leoleo ma moe: puipuia mamoe, feagai ma manu fe'ai, ma faamaoni i lana galuega.

Faamaonia i lalo o le ata le fuaiupu: "Faamaoni i mea laiti, sauni mo mea tetele".

(E): **Tiute La'iti (Shepherd Challenge)**

Fai i tamaiti e lisi mai mea laiti e mafai ona latou fai i le vaiaso. Totonu o le aiga, a'oga, po o le Ekalesia.

PESE: Only a Little Boy David

Only a boy named David, Only a little sling,
Only a boy named David, but he could pray and sing...

Only a little boy David, Only a babbling brook.
Only a little boy David, and five little stones he took.

One little stone went into the sling, and the sling went round and round.
One little stone went into the sling, and the sling went round and round.

Round and round, and round, and round, and round, and round, and round.

One little stone went up, up, up, and the giant came tumbling down.

A'OA'OGA:

1. Ia fai mea uma ma le fa'amaoni.
2. E tāua le fa'alagolago i le Atua i lona poto ma lona malosi.
3. E lē fefe le tagata ua mafuta ma fa'auō i le Atua.

.....

MANATU TA'IALA NOVEMA:

“GALUE, O LE FINAGALO LEA O LE ATUA”

O le faia ai e le Atua o le tagata, o le fa'amoemoe lava ina ia galue ma tausii lana foafoaga i le amataga. O le finagalo moni lea o le Atua mo soo se tagata o loo soifua ma ola i le ola mai le Atua. Ia lē na o le talitonu e ala i le fa'atuatua, a ia o faatasi le talitonu ma fa'atinoga, ina ia moni le fa'atuatua.

ASO SA: 1 NOVEMA 2026

MATAUPU: E OTI LE FA'ATUATUA E AUNOA MA GALUEGA

SINI: Ia malamalama le vasega, e lē na o le iloa ma le fa'atuatua i le Atua, a ia o fa'atasi ma galuega fa'atino.

TUSI FAITAU: Iakopo 2:14–26

FESOASOANI MO FAIAOGA:

O le mataupu o lenei aso Sa, ua fa'aalia manino ai e Iakopo se manatu tāua mo le atoaga o le tagata ua fa'atuatua ma le faamaoni i le Atua. I le manatu o Iakopo, e le lava le talitonu i le Atua, ae e tataua ona fa'aalia i galuega. O le tala e fa'aalia ai le eseese i le va o le talitonu moni ma fa'atino, ma le talitonu ua na o upu, ae leai ni galuega.

O loo fa'aaoga e Iakopo ni fa'ata'ita'iga faigofie ma manino. Mo se faataitaiga, afai e i ai se tagata o loo feagai ma tigā ma le leai o ni mea'ai i lona siosiomaga, e lē lava le fai atu ia te ia, “Ia manuia oe, ma ia saogalemu,” ae e tataua ona fesoasoani atu ma avatu i ai ni mea'ai po o se fesoasoani. Afai e lē faia se fa'atinoga, o le faatuatua lenā e leai se aoga, o le fa'atuatua e oti.

O loo atagia mai i le manatu o Iakopo, o le fa'amaoni i le Atua e aofia ai le galue malosii i galuega lelei. O galuega lelei e pei o le alofa atu ma le agalelei atu i isi, e faamautu ai le talitonu ua tumau i le Atua. O le faatuatua e le mafai ona ola e aunoa ma galuega, poo galuega e faamaonia ai le faatuatua. O galuega lelei e fesoasoani e faasaoina ma faamalosi ai isi, ma faaalia ai le alofa o Keriso i le lalolagi. O le faamaoni i galuega, e mafai ona avea ma molimau malosii i le Atua i o tatou aiga, aoga, po o le nuu atoa ma le Ekalesia.

Ma o le faamalosi lea o loo i le tala o lenei aso Sa. O loo faailoa mai ai, e le gata i le talitonu i le Atua, ae e tataua foi ona tatou fa'aalia i le olaga o aso uma, e ala i le fesoasoani, o le alofa, ma le tausiga i isi o loo moomia se fesoasoani. E le gata i lea, a'o loo faamanatu mai ai le taua o le faamaoni i galuega i aso uma, e o'o lava i mea laititi, ona fa'amanuia tele mai lea o le Atua mo i tatou.

GALUEGA FAATINO: TUSIGA FUAIUPU

Fa'aaoga upu nei i ni fuaiupu. (fa'atuatua, galuega, fa'amaoni, alofa). Ia atagia i fuaiupu le uiga o le mataupu sa talanoaina.

PESE: Fa'alagolago i a'ao o Iesu.

A'OA'OGA:

1. E moni le fa'atuatua ina ua i ai faatasi ma fa'atinoga.
2. Ia moni le olaina o le alofa, ae lē na o upu.
3. Ia fa'alagolago i le galue mai o le Agaga Paia i mea e ao ona fai.

.....

ASO SA: 8 NOVEMA 2026

**MATAUPU: O IESU O LE ALA, LE UPU MONI, MA LE
OLA**

SINI: Ia malamalama le vasega, e leai lava se isi ala
tatou te ulufale atu ai i le ola e fa'avavau, ua na
o Iesu lava.

TUSI FAITAU: Ioane 14:1-14

FESOASOANI MO FAIAOGA:

O le mataupu o lenei aso Sa, e i ai le manatu ua tele ina fa'alogi ai.
Peita'i, e i ai se lagona, atonu o loo i ai nisi ua faalogi i ai, ae lē o
malamalama i le mafuaaga ma lona fa'aogaina. I se tala'aga o le tatou
mataupu ma le tala sa faitauina, o le tala ia Iesu o loo saunoa atu ma
fetalai atu i ona soo, i le taimi na latou popole ai ma fefefe ona o le mea
o le a tupu i le lumana'i. Na faamautinoa atu e Iesu ia i latou e le tataua
ona fefefe, aua o Ia e alu e saunia se nofoaga mo i latou i le lagi, ma
folafola lona toe fo'i e ave i latou i le mea o loo Ia i ai.

O le tau fa'apupulaina o lenei mataupu e Iesu, o loo faamatalaina ai
lmatafaioi autū o Iesu i le olaga ma le faatuatua o tagata.

O le Ala: O Iesu o le ala i le Atua ma ola e faavavau. O le alu atu o le
tagata i le Atua, e ala atu ia te Ia. E le o se auala e faia e tagata, ae o le
ala moni e maua ai le ola e fa'avavau. A fa'amatala i se isi fa'aupuga,
o le tagata ua talia Iesu, ua ola i a'oa'oga a Iesu, ua amio faa-Iesu, o le
tagata lenā o loo sa'o le ala o loo ola ai, ma e mautinoa lona taunuu i le
ola e fa'avavau.

O le Upu Moni: O Iesu o le Upu Moni a le Atua. O le "upu" o loo
fa'atauina lava ia Iesu. Ua liutino tagata le "upu", o Iesu lava o le upu
ua liutino tagata. E to'atele nisi latou te lē taliaina ma talitonu ia Iesu
a'o i ai i le lalolagi. O lea ua fa'aailoa manino, o lona i ai i le lalolagi, e

moni ma fa'amaoni. Ua a'oa'oina i tatou i a Iesu, o le finagalo moni o
le Atua i le lalolagi.

O le Ola: O Iesu o le Ola. O Ia lava, e mafai ona tatou maua ai le ola e
le fa'avavau, e aofia ai le ola i le agaga ma le ola i le i'uga.

Ua a'oa'o mai le tala o lenei aso Sa ma fa'aalia ai le tāua o le talitonu
ma le faalagolago i an Iesu i soo se vaipanoa o le ola, tusa lava pe feagai
ma faigata poo tofotofoga. E tāua le manatua, o Iesu o loo ia i tatou i
taimi uma, ma e mafai ona tatou fesili ma fa'amoemoe ia te Ia mo so'o
se mea e mana'omia i le olaga.

I le aotelega o lenei tala, e faamautinoa le loto filemu i le talitonu ia
Iesu, ma fa'aali mai ai le tāua o le talitonu ma le faamaoni, ola i le tatalo,
ma le fa'alagolago i le Atua i o tatou olaga i aso uma.

GALUEGA FAATINO: Mate i le ola ma le oti.

Ia vavae le vasega i ni vaega se lua. Ia ta'ito'atasi ma i le vaega, e
fa'atino ai le matematega. E mate le mata'itusi. E atoa loa le 5 o mate
sesē, o lona uiga ua faiaina.

— _ ' _ nei _ _ _ _ _ i _ _ _ _ _ ; _ _ _ i _ _ i _ _ i _ _ _ _ _ i i _
_ _ _ _ , _ _ _ _ _ _ _ i _ _ i _

Ioane 10:9(a) (*O a'u nei o le faitotoa; afai e ui mai se tasi ia te au, e
faaolaina ia*)

PESE:

Iesu o le ala upu moni (pese workshop 2025)

Iesu o le ala upu moni

O Ia foi o le ola moni

Talia nei o Ia ma le fa'amaoni

Ona maua lea o le olioli

Lototele ma le faatuatua
O le ala lea mo i ta'ua
Tuu nei loa o le feitaga'i
Mana'i Iesu i le fealofani

A'OA'OGA:

1. O le ala i le malo o le Atua, o loo ia Iesu Keriso.
2. Ia mataala i fa'atosina a le lalolagi, e pepelo ma fa'asalaina ai.
3. O Iesu lava o le ola, mo soo se tasi o fia sa'oloto,

.....

ASO SA: 15 NOVEMA 2026

MATAUPU: O LE USITA'I O TITO

SINI: Ia malamalama le vasega, o le fa'alogo lelei ma le usita'i o Tito i mea na a'oa'oina ai, na mafua ai ona avea ma auauna tala'i o le Talalelei.

TUSI FAITAU: Tito 1:1-9

FESOASOANI MO FAIAOGA:

O le tusi a Paulo ia Tito o se tasi o ana tusi fa'afaifeau (Pastoral Epistles), na tusia e fesoasoani ai i ona soo i le galuega, o le tala'iina ma le fa'atuina o Ekalesia fou. O Tito o se tasi o tagata talavou na avea ma fesoasoani i a Paulo. O se taule'ale'a e masani ona faamaoni ma ususita'i i galuega uma sa tofia ai o ia. E lē o se tagata lutaia Tito, a o ia o se tagata Eleni (Kalatia 2:3) ma o se tasi o pine fa'amau o le salalau o le Talalelei i tagata ese, e ese mai ia Israelu. Na tuua e Paulo Tito i le motu o Kereta, o se nofoaga sa faigata tele ona ola ai se Kerisiano. E lauiloa Kereta i le tele o tagata lē faamaoni,

pepelo, ma le ola fa'asolitulafono. O iina sa tofia ai Tito e va'ava'ai ma tausia le Ekalesia, i le fa'atulagaina o ta'ita'i, ma a'oa'o tagata talavou ina ia ola ma usitai i le Atua.

Na fa'amalosi atu Paulo ia Tito, ina ia faatonu i tama talavou ina ia fa'autauta i mea uma. (Tito 2:6). O le uiga o lea manatu mo tupulaga talavou, e ui lava i le malosi o le tino ma le i ai i le tauosoosoga o le malosi ma le iloa, ae e tatau lava ona fa'atonutonuina e ala i le ususita'i ma le fa'autauta. O le olaga o Tito o se fa'ata'ita'iga lelei mo tupulaga. E le gata o ana upu, o ana galuega, aemaise o le amio lelei ma le ola i le upu moni. O le ala lea na mafai ai e Paulo ona tofia Tito i galuega tetele, auā sa iloa e Paulo, o Tito o le taule'ale'a e faamaoni ma usitai. E ui o se tagata talavou, ae na mafai ona avea o ia ma ta'ita'i lelei mo isi.

GALUEGA FAATINO: (A): Ta'aloga "Usitai Vave"

Ia saunia e le faiaoga ni fa'atonuga faigofie (fa'ata'ita'iga: "tu i luga", "nofo i lalo", "sii lima i luga" ma isi.

O tamaiti e tatau ona vave usitai. O i latou e tuai pe sese le fa'atinoga, e alu i fafo.

Sini: Ia iloa ai le tāua o le usita'i i le taimi tonu ma le sa'o.

(E): Talanoaga Laiti (Small Group Discussion).

Vaeluaina tamaiti i ni vaega se lua pe tolu.

Fesili:

1. O le ā le uiga o le upu "usita'i"?
2. O ā ni taimi e faigata ai ona usita'i?
3. A filifili oe i se galuega, o le a sau tali?

Manatu e Faamalosi i le Vasega:

O le usita'i e le gata o se galuega i aso uma, ae o se faailoga o lo tatou alofa i le Atua.

E mafai ona avea so'o se talavou ma faata'itaiga lelei e pei o Tito.

PESE: I want to be a worker for the Lord

I want to be a worker for the Lord,
I want to love and trust His holy word,
I want to sing and pray and be busy every day,
In the vineyard of the Lord.

I will work, I will pray, In the vineyard, in the vineyard of the Lord.
I will work, I will pray, I will labor every day in the vineyard on the
Lord.

I want to be a worker strong and brave,
I want to trust in Jesus' power to save.
All who will truly come shall find a happy home.
In the kingdom of the Lord.

A'OA'OGA:

1. O le ola usita'i i mea lelei e maua ai le fa'amanuiaga.
2. E mafai e soo se talavou ona avea ma fa'ata'ita'iga lelei i isi.

.....

ASO SA: 22 NOVEMA 2026

MATAUPU: O LE TOE AFIO MAI O IESU

SINI: Ia malamalama le vasega, e tatau ona tapena mo
le toe afio mai o Iesu.

TUSI FAITAU: Fa'aaliga 22:12–21

FESOASOANI MO FAIAOGA:

O le tusi o Fa'aaliga o se tusi e sili ona loloto lona uiga i le Tusi Paia.
Na tusia e Ioane le Aposetolo a o nofo to'atasi i le motu o Patamo, ona
o lona faamaoni i le tala'iga o le Talalelei (Fa'aaliga 1:9). Na faailoa
atu e le Atua ia te ia ni fa'aaliga e uiga i le lumana'i, ma le fa'aiuga o
le tala faasolopito o le lalolagi.

I le vaega mulimuli (Fa'aaliga 21–22), o loo ta'ua ai le lagi fou ma le
lalolagi fou, o le a i ai ai le Atua ma ona tagata e aunoa ma le tiga po o
le oti. Ua avea lenei ma ata matagofie o le olaga e faavavau lea o loo
fa'atalitali i ai Kerisiano uma.

I le vaega o le tatou mataupu (22:12–21), o loo i ai le fa'amamafa tele
a Iesu lava ia i lana folafolaga e uiga i lona toe afio mai. Ua fetalai atu
o Ia, “Faauta, ou te vave alu atu” (f. 12, 20). O se ta'utinoga mautinoa,
e le gata i le Talalelei i le taimi o Ioane, ae faapea foi ma i tatou i aso
nei.

Ua faailoa mai foi o lona toe afio mai e le gata o se fa'amoemoe mo
Kerisiano, ae o le a i ai foi le fa'amasinoga mo tagata uma. O lona uiga
i le finagalo o le Alii, o lona toe afio mai, ina ia fa'aola le Kerisiano o
loo tumau lona ola ia te Ia. Ae fa'amasino ma fa'asala i le tagata o loo
tete'e ia te Ia, e ala i le sauāina ma le soona upuleaga i tagata ua o latou
talitonu i le Talalelei ia Iesu Keriso. Auā o le taimi tonu lea o le tusi
lenei o Fa'aaliga, o le vaitau o le sauāina o le au Kerisiano. O le vaai la
i le tala o le toe afio mai o Iesu, o se valaau mo tagata uma, e aofia ai le
Kerisiano ma le tagata e le'i faa-Kerisianoina.

O le valaau fa'aiu e fua i ai tapenaga a le tagata. O le tala o loo
faamanatu mai ai, o le olaga o le tagata i lenei lalolagi e le tumau. O le
faamoemoe foi o le Kerisiano, e le gata i mea o le taimi nei, ae o le
lumana'i faavavau i le lagi. O le toe afio mai foi o Iesu o se tala lelei
mo i latou e faamaoni, ae o se lapataiga mo i latou e lē ususitai. O le
fesili mo i tatou uma, “Po ua o tatou sauna mo le toe afio mai o Keriso?”

GALUEGA FAATINO: (A): Talanoaga.

Fesili mo le talanoaga.

- O le ā le uiga o le toe afio mai o Iesu mo oe?
- E faapefea ona tatou sauni i aso uma mo lona toe foi mai?

(E): Faia se tala faatino (Role Play)

1. Se tagata e faatalitali faamaoni i le toe foi mai o le Alii. O lana amio, o ana mea e fai, o foliga va'aia e iloa a o le tagata e fiafia ia Iesu.
 2. O se tagata e le popole i le toe foi mai o le Alii. E ulavale, e mimita, e leaga le amio, e lē fiafia e faitau le Tusi Paia, ma isi.
- Faatalanoa i le eseesega o o la'ua taunu'uga.

PESE: Oh, be careful little eyes, what you see
Oh, be careful little eyes, what you see.
Oh, be careful little eyes, what you see.
There's a Father up above, looking down in tender love,
So be careful little eyes, what you see.

Be careful little ears what you hear
Be careful little mouth what you say...
Be careful little hands, what you touch...
Be careful little feet, where you go...

A'OA'OGA:

1. E moni ma fa'amaoni le toe afio mai o Iesu i le lalolagi.
2. Ia tapena o tatou tagata mo Iesu ma lona malo.
3. E fa'asala le tagata e tete'e ia Iesu ma lona finagalo.

.....

ASO SA: 29 NOVEMA 2026

MATAUPU: IA FA'AMUAMUA LE ATUA

SINI: Ia malamalama le vasega, o le fa'amuumua e tatau ona ave i le Atua, o le pogai o manuia.

TUSI FAITAU: Hakai 1:1-10

FESOASOANI MO FAIAOGA:

Pe tusa ma le 50,000 tagata Iutaia na toe foi i lo latou nu'u mai Papeleonia, le nu'u sa fa'atafea i ai, ma ua latou nofoia ai Ierusalem. Peita'i, o le malumalu ma le lafanua lafulemu ua matua fa'atafunaina lava. Ona amata lea ona latou toe galuea'ina le fanua. Peita'i, e galulue fua ae pei lava e lē malie le tu'u malepe ai pea o le malumalu tapua'i i lo latou Atua. O le ala lea na tonu ai i o latou nanatu, e tatau ona fa'amuumua le toe fausia o le malumalu tapua'i i le Atua, ae mulimuli o latou fale. O le malumalu o le fale e afio ai le Atua, ma e tatau ona ave i ai le fa'amuumua. O le i ai o le malumalu i totonu o le nu'u o le fa'ailoga foi lea o lo'o fa'atsasi le Atua ma i latou. A'o le ata manino o lo latou fa'amuumua o le Atua i o latou loto ma agaga, auā e afua mai le Atua manuia o le nu'u.

Ua amata le galuega ma ua ma'ea le fa'avae, a ua toe suia foi manatu o tagata ma fa'apea ane. Se'i ta'atia le faiga o le malumalu, ae se'i fai muamua o latou fale e nonofo ai. Ona fa'apea foi lea ona fai, ua fa'asaga lava le tagata ia e fau lona fale. Pe tusa o le 16 tausaga mulimuli ane ai, talu ona toe foi ane le tafeaga, ae tula'i ane loa le perofeta o Hakai ma ta'u atu i le nu'u le fiinagalo o le Atua.

Ua mavae foi ni nai masina ae toe fa'aali le Atua ia Hakai. O le upu fa'amalosi mo le nu'u ina ia fausia le malumalu, o le fa'ailoga o le fa'amuumua o le Atua ia i latou. Ua uma foi ona folafola e le Atua o le a sili atu le mamalu ma le matagofie o le malumalu o le a faia nei, nai

lo le malumalu na faia e le tupu o Solomona. E le gata i lea ua fa'amanuia foi le Atua i le malumalu o le a faia nei.

O le agaga usiusita'i ma le alofa moni i le Atua, e manino ai le fa'amoemoe moni ma le loto naunau atu e fa'amuumua le Atua i mea uma o le olaga, e pei o le fausia muamua o le malumalu, mo le tapua'iga i le Atua. O le ata lena o le fa'amuumua o le Atua i me uma latou te faia.

GALUEGA FA'ATINO:

(A) Fa'aaliga o manatu: "O le ā e te filifilia muamua?"

Saunia ni ata o mea nei: fale, aiga, tupe, mea'ai, a'oga, lotu, tatalo.

Faailoa i fanau i ni vaega se lua ma fai atu: "*Afai e na o le tasi le mea e mafai ona e filifilia muamua, o le ā lea?*"

Fa'asoa: Aiseā e tatau ai ona faamuamua le mea ua ia filifilia nai lo isi mea. Ia manatu, e ao lava ona fa'ataua o latou manatu. Afai o meaai, ia tau lava o le fa'aailoa i ai, e le na o meaai e ola ai.

(E) Talanoaga (Group Discussion)

Fesili i fanau/talavou:

1. O ā ni mea e masani ona e faamuamua i lou olaga i aso uma?
2. E faapefea ona e faamuamua le Atua i lau a'oga, fale, ma au uō?
3. O le ā le mea e tupu pe a tatou tuulafoa'i le Atua e pei o tagata i taimi o Hakai?

Faai'u i le manatu: *E le manuia galuega a le tagata pe a tuulafoa'i le Atua.*

PESE: This little light of mine

This little light of mine, I'm gonna let it shine.
This little light of mine, I'm gonna let it shine.
This little light of mine, I'm gonna let it shine.
Let it shine, let it shine, let it shine!

Hide it under a bushel, NO! I'm gonna let it shine...
All around the neighborhood, I'm gonna let it shine...
Don't let Satan put- it out! I'm gonna let it shine...
Let it shine 'til Jesus comes. I'm gonna let it shine...

A'OA'OGA:

1. Ia fiafia e fa'amuumua le Atua i le ola, e fa'amanuiaina ai.
2. O le alofa i le Atua, o le faia o lona finagalo.
3. Aua le naunau i mea lē aoga, ae naunau i le Atua e ola ai.

.....

MANATU TA'IALA TESEMA:

"O IESU LE TUPU UA AFIO MAI"

Ua tatou i ai i le masina mulimuli o lenei foi tausaga if eau ma galuega faa-le-a'oga aso Sa. E masani lava i lenei masina, o le tapenaina o le tino, mafaufau ma le agaga, mo le afio mai o Iesu le pepe o le Kerisimasi. O le feau foi lea o lenei masina, ina ia toe fa'amanatu i fanau, o Iesu ua fanau mai, o le Tupu lava lea ua afio mai.

ASO SA:

6 TESEMA 2026

MATAUPU:

SAUNI MO LE FANAU MAI O IESU

SINI:

Ia malamalama le vasega, na sauni lelei le taupou o Maria mo le fanauina mai o Iesu.

TUSI FAITAU:

Luka 1:26–38

FESOASOANI MO FAIAOGA:

A o lei fanau mai Iesu, na auina atu e le Atua le agelu o Kaperielu i le nuu o Nasareta e faailoa atu i a Maria le tala ofoofogia. O le a ia fanauina le Alo o le Atua e ala i le mana o le Agaga Paia. E ui ina taufa’afefe ma faigatā le fe’au, ae na tali Maria ma le loto faamaoni, **“Fa’auta, o a’u nei o le auauna a le Alii; Ia faia ia te a’u e tusa ma lau fetalaiga”**

O lenei tala e faailoa mai ai le amataga o le fuafuaga a le Atua mo le fa'ataunuaina o le faaolataga. O le folafolaga ia Maria o le la'asaga muamua lea o le fanau mai o le Faaola i Peteleema. Ua vala'auina tagata uma e tapena loto, auā o le fanau mai o Iesu e lē na o se tala faasolopito, ae o se valaau foi i le taimi nei e faataga Iesu e ola i o tatou loto.

O le fesili e mafaufau pea i ai, “Pe na sauni Maria mo le fanauina mai o Iesu mai lona manava?”. E eseese lagona o tagata. Peita’i mo i tatou tamaiti, ia tumau lo tatou talitonu, “Io”, na sauni Maria mo le fanau mai o Iesu ia te ia. Ae pe aisea foi ua filifili ai lava Maria. O loo manino le tala a le Tusi Paia, o Maria o le taupou. O se tagata sa ola mamā, o se tama’ita’i ola fa’apaiaina.

O le mafuaaga foi lea na filifilia ai e le Atua mo le fanauina mai o le pepe o Iesu, ona o lona ola mamā ma lona loto filemu.

GALUEGA FAATINO: Fesili ma Tali.

1. O le ā le uiga o le upu Emanuelu?
2. Aisea na filifilia ai Maria e le Atua?
3. E fa'apefea ona iloa, sa sauni Maria mo le fanau mai o Iesu?
4. O a ni mea e iloa ai, ua sauni le ola mo le fanau mai o Iesu?

PESE: Spirit of the living God
Spirit of the Living God,
Fall afresh on me,
Spirit of the Living God,
Fall afresh on me.

Break me, melt me, mold me, fill me.
Spirit of the Living God,
Fall afresh on me.

297 Spirit of the Living God

1. Spi - rit of the liv - ing God, fill a - fresh on me,
2. Spi - rit of the liv - ing God, move a - mong us all.

Spi - rit of the liv - ing God, fill a - fresh on me,
make us one in heart and mind, make us one in love.

Break me, melt me, mold me, fill me;
hum - ble, ear - ing, self - less, shar - ing.

© 2008 Blackwell Publishing Ltd
Journal compilation © 2008 Blackwell Publishing Ltd
All rights reserved. No part of this publication may be reproduced, stored in a retrieval system, or transmitted, in any form or by any means, electronic, mechanical, photocopying, recording, scanning, or otherwise, without prior permission in writing from Blackwell Publishing Ltd.

A'OA'OGA:

1. Ia nofo sauni i taimi uma mo le valaau mai o lo tatou Alii.
2. O le loto mauualalo e fa'aeaina ai

3. Ia ola fa'apaiaina ma ola i se olaga mamā

.....

ASO SA: 13 TESEMA 2026

MATAUPU: O LE FANAU MAI O IESU

SINI: Ia malamalama le vasega, o le fanau mai o Iesu, o le oo mai lava lea o le fa'aolataga i le lalolagi.

TUSI FAITAU: Luka 2:1–20

FESOASOANI MO FAIAOGA:

O le fanau mai o Iesu o le ogatotonu lea o le tala lelei a le Tusi Paia. Na tusia e Luka lenei tala i se auala auiliili, ina ia mafai ai e tagata ona iloa le moni o le tala faasolopito o le faaolataga.

O le vaitau na pule ai le Emepaea o Roma, ma sa faia e Kaisara Aokuso se poloaiga ina ia faitau tagata i nuu ta'itasi. O lea na malaga ai Iosefa ma Maria i Peteleema, le aai o Tavita, auā o iina le aiga o Iosefa. O le faamoemoe o le faitau tagata o se polokiki, ae o le faamoemoe o le Atua o le fa'ataunuuina lea o lana folafolaga, o le Mesia e fanau i Peteleema (Mika 5:2).

Na fanau ai Iesu i se fale manu ona e lē i maua se potu mo i latou. O le Tamā o le Lagi na filifili e fanau mai lona Alo i se tulaga mauualalo ma faigofie, o se faailoga o lona fa'amaulaloina ma lona alofa mo tagata uma.

O le po lava lea, na faailoa atu e agelu le tala fiafia i leoleo mamoe o loo i le fanua, “Ua fanau mai ia te outou i le aso nei le Faaola, o Keriso le Alii, i le aai o Tavita” (Luka 2:11). O le tala lenei na siitia ai le fiafia ma le viiga i le Atua, ma o leoleo mamoe na muamua molimau i le fanau mai o le Mesia.

O le tala fiafia mo le lalolagi uma, le tala i le fanau mai o Iesu. O le Atua ua liu tino tagata, ua afio mai i le lalolagi e fa'aola ma lavea'i lana tagata ua pologa i le agasala. O le fanau mai o Iesu, na fai meaalofoa i ai i latou na i ai. O lea ua oo mai i o tatou taimi, o loo famanatuina ai lava lea aso tāua. O le fesili, “Po ua e sauni ea mo se meaalofoa mo lona fanau mai?”. Tatou te le tau o e su'e Iesu e ave i ai se meaalofoa. E lē tau fa'atauina foi se meaalofoa. Ua na o lou ola lava e mana'o i ai Iesu ua fanau mai. Ola lelei, ola fiafia e mafuta ia Iesu i le tatalo, ola galue mo le Talalelei ia Iesu Keriso.

GALUEGA FAATINO: FA'ATINO LE TALA.

E masani lava i lenei vaitau o le tausaga, e faatino ai lava le tala o le Kerisimasi. O le fa'amoemoe foi lea e taualuga i ai galuega faa-le-A'oga aso Sa.

PESE: We wish you a merry Christmas...

A'OA'OGA:

1. O Iesu le tupu o tupu ua afio mai mo i tatou uma.
2. Ia tapena o tatou loto mo Iesu ua afio mai.
3. Sau meaalofoa mo le pepe o le Kerisimasi o lenei tausaga.

Ia manuia tele le Kerisimasi ma le Tausaga Fou.